

四庫全書

集部

欽定四庫全書

集部
唐詩鏡卷一至三

詳校官庶吉士 臣 范逢恩

主事銜 臣 徐以坤 覆勘

總校官編修 臣 王燕緒

校對官中書 臣 孫 溶

謄錄監生 臣 趙 與 昱

欽定四庫全書

唐詩鏡卷一

明陸時雍編

初唐第一

唐之勝於六朝者以七古之縱七律之整七絕之調此其故在視局聲調之間而精神材力未能駕勝以五律視昔相去遠矣聲不達韶色不達麗神不達醉情不達深雖沈不綺思僅足當梁陳之中駟耳至五言古詩其道在神情之妙不可以力雄不可以材騁不可以思得不可以意教雖李杜力挽古風而李病於浮杜苦於刻以追陶謝之未能况漢魏乎韋蘇州得六朝之藻而無其實柳子厚得六朝之幹而無其

華亦足並李杜而稱一代之雄矣五言絕句古道盡
亡間有作者存十一於千百矣然唐之有可稱者以
其能洗妖淫之氣而歸平正之音也
代不如古亦以見風氣之所趨矣

太宗皇帝

本紀云姓李氏諱世民高祖第二子高祖起
義兵拜右領大都督封燉煌郡公徙封趙國

公高祖受禪拜尚書令右武侯大將軍進封秦王海
內漸平乃銳意經籍開文學館以待四方之士杜如
晦等十有八人為學士與之討論高祖傳位在位二
十四年崩謚文皇帝有集四十卷 帝嘗作宮體詩
使虞世南膺和世南曰聖作誠工然體非雅正上有
所好下必有甚焉恐此詩一傳天下風靡不敢奉詔
帝曰朕試卿爾後帝為詩一篇述古興亡既而歎曰
鍾子期死伯牙不復鼓琴朕此詩何所示邪勅褚遂
良即世南
靈座焚之

五言古詩

帝京篇

并序

余以萬幾之暇游息藝文觀列代之皇王考當時之
行事軒昊舜禹之上信無間然矣至於秦皇周穆漢
武魏明峻宇雕牆窮侈極麗征稅殫於宇宙轍跡徧
於天下九域無以稱其求江海不能贍其欲覆亡顛
沛不亦宜乎余追踪百王之末馳心千載之下慷慨
懷古想彼哲人庶以堯舜之風蕩秦漢之弊用咸英

之曲變爛漫之音求之人情不為難矣故觀文教於
六經閱武功於七德臺榭取其避燥濕金石尚其諧
神人皆節之於中和不係之於淫放故溝洫可悅何
必江海之濱乎麟閣可翫何必山陵之間乎忠良可
接何必海上神仙乎豐鎬可游何必瑤池之上乎釋
寶求華以人從欲亂於大道君子耻之故述帝京篇
以明雅志云爾

落日雙闕昏迴輿九重暮長煙散初碧皎月澄輕素寒

愧斲琴書開軒引雲霧斜漢耿層閣清風搖玉樹

太宗麗色來自齊梁蒼骨本之隋氏
長烟散初碧皎月澄輕素語藻而潔

山閣晚秋

山亭秋色滿巖牖涼風度疎蘭尚染煙殘菊猶承露古
石衣新苔新巢封古樹歷覽情無極咫尺輪光暮

五六語佳新古字不宜疊
用或當時以此為致耳

附登三臺言志引月擘宵桂飄雲迥曙鱗下句佳取
景在一鱗字 初春登臺綺峯含翠霧照日蕊紅林
蕊字奇又嬌花烏續吟一語最勝 秋日叢庾信體
螢火不溫風與流螢帶火寒相去何啻天壤 過舊

宅紉佩蘭開徑舒圭葉剪桐
語既有韻剪桐更饒想致

虞世南

本傳云字伯施越州餘姚人性沈靜寡欲與兄世基同受學于顧野王時人方之二陸為文章

婉嫻祖述徐陵為秦府參軍貞觀中累遷至祕書監
賜爵永興縣子太宗每稱其有五絕德行忠直博學
文詞書翰也卒謚文懿勅曰世南於我猶一體也拾
遺補闕無日暫忘實當代名臣人倫準的今其云亡
石渠東觀中無復人矣世
南在隋有詩已載隋詩中

五言古詩

從軍行

塗山烽候驚弭節度龍城冀馬樓蘭將燕犀上谷兵劍

寒花不落弓曉月逾明凜凜嚴霜節冰壯黃河絕蔽日
卷征蓬浮天散飛雪全兵值月滿精騎乘膠折結髮早
驅馳辛苦事旌麾馬凍重關冷輪摧九折危獨有西山
將年年屬數奇

劍寒花不落弓曉月逾明是隋
人語風味之佳律中得此最勝

結客少年場行

韓魏多奇節個儻遺聲利共矜然諾心各負縱橫志結
交一言重相期千里至綠沈明月弦金絡浮雲轡吹簫

入吳市擊筑遊燕肆尋源博望侯結客遠相求少年懷
一顧長驅背隴頭鏃鏃戈霜動耿耿劒虹浮天山冬夏
雪交河南北流雲起龍沙暗木落鴈門秋輕生殉知己
非是為身謀

獨饒

風骨

五言律詩

侍宴應詔賦韻得前字

芬芳禁林晚容與桂舟前橫空一鳥度照水百花然綠

野明斜日青山澹晚煙濫陪終宴賞握管類窺天

五六標格自成不煩點飾

褚亮

本傳云字希明錢塘人太宗既平寇亂留意儒學於宮城西起文學館亮與杜如晦房玄齡于志寧

蘇世長薛收姚思廉陸德明孔穎達李玄道李守素
虞世南蔡允恭顏相時許敬宗薛元敬蓋文達蘇最
十八人並以本官為學士薛收卒以劉孝孫補之使
亮為圖贊貞觀中歷散騎常侍封陽翟縣男進爵為
侯卒謚曰康

五言排律

和御史韋大夫喜霽之作

晴天度旅鴈斜影照殘虹野淨餘煙盡山明遠色同沙
平寒水落葉晚枝空白簡光朝憶形駟出禁中息駕
遊蘭坂雕文折桂叢無因輕羽扇徒自仰仁風

三四五六語色閒淨
不沾沾摸擬得來

魏徵

本傳云字玄成鉅鹿人初為隱太子洗馬太子事
敗太宗拜諫議大夫封鉅鹿縣男帝嘗引入卧内

訪以得失遷秘書監預參朝政後代王珪為侍中高
書進封鄭國公多病辭職乃拜特進知門下省事帝
嘗謂侍臣曰貞觀以前從我平定天下周旋艱險玄
齡之功無所與讓貞觀之後盡心於我獻納忠謹安
國利民犯顏正諫匡朕之違者唯徵
而已古之名臣何以加也卒謚文貞

五言古詩

述懷

中原還逐鹿投筆事戎軒縱橫計不就慷慨志猶存杖
策謁天子驅馬出關門請纓繫南粵憑軾下東藩鬱紆
陟高岫出沒望平原古木鳴寒鳥空山啼夜猿既傷千
里目還驚九折魂豈不憚艱險深懷國士恩季布無二
諾侯嬴重一言人生感意氣功名誰復論

挺挺有烈士風古木鳴寒鳥空
山啼夜猿是初唐一等格力

楊師道

本傳云字景猷華陰人清警有才思隋末自洛陽來歸尚柱陽公主累轉太常封安德郡公貞

觀中拜侍中參預朝政退朝必引當時英俊宴集園池文會之盛一時莫比酬賞之際援筆直書有如宿

構太宗每見其詩必吟諷嗟賞卒謚曰懿

五言律詩

初秋夜坐應詔

玉琯涼初應金壺夜漸闌滄池流稍潔仙掌露方溥鴈聲風處斷樹影月中寒爽氣長空淨高吟覺思寬

三四
脩潔

五言排律

還山宅

暮春還舊嶺徙倚耽年華芳草無行逕空山正落花垂
藤掃幽石卧柳礙浮槎鳥散茅簷靜雲披澗戶斜依然
此泉路猶是昔煙霞

幽澹似深山人

語三四自然

孔紹安

文苑傳云山陰人與孫萬壽以文辭稱時稱孫
孔高祖受禪拜內史舍人詔撰梁史未成而卒

有文集

五卷

五言絕句

侍宴詠石榴

紀事云紹安大業末為監察御史高祖為隋討賊河東詔紹安監其軍深見接遇高祖受禪紹安自洛陽間行來奔高祖大悅拜內史舍人時夏侯端亦嘗為御史監高祖軍先紹安歸朝授祕書監紹安因侍宴詠石榴云云時人稱之

可惜庭中樹移根逐漢臣只為來時晚花開不及春

語氣彷彿隋餘

馬周

本傳云字賓王清河人武德中補博州教授不治事刺史達奚恕數咎責之乃遊曹汴為浚儀令崔

賢所辱遂感激西至長安客常何家太宗召之累遷
至中書令兼太子右庶子職兼兩宮處事精密甚獲
時譽尋以本官
兼吏部尚書卒

五言律詩

凌朝浮江旅思

太清上初日春水送孤舟
山遠疑無樹潮平似不流
岸花開且落江鳥沒還浮
羈望傷千里長歌遣四愁

三四意晚然中
晚却不屑此作

杜淹

紀事云字執禮秦王引為天策府曹參軍賦詩尤
工楊文幹反辭連太子歸罪于淹流寓州貞觀初

召為御史大夫後檢校
吏部尚書預參朝政

五言排律

詠寒食鬪鷄應秦王教

寒食東郊道揚鞞競出籠
花冠初照日芥羽正生風
顧敵知心勇先鳴覺氣雄
長翹頻掃陣利距屢通中
飛毛遍綠野灑血漬芳藜
雖然百戰勝會自不論功

語自正當視庾信
等作似青出藍

蕭翼紀事云太宗時為監察御史充使取王羲之蘭亭序真蹟於越僧辯才歸擢員外郎

五言律詩

答僧辯才

太宗酷好二王書聞蘭亭真蹟在永欣寺僧辯才所百計求之不獲房玄齡薦翼多權謀必能稱旨翼乃作南人北遊辯才一見歎密留宿設缸面酒酣樂之後探韻賦詩翼得招字云云既而術取書以歸太宗大悅權員外郎賞賚甚厚見類苑

邂逅良宵殷勤荷勝招彌天俄若舊初地豈成遙酒
蟻傾還泛心猿躁似調誰憐失羣翼長苦業風飄

語氣
調和

王績

隱逸傳云字無功絳州人文中子通弟也少與李

里嘗躬耕東臬著書號東臬子或經過酒肆動經數
日往往題壁作詩多為好事者諷詠所著有五斗先
生傳醉鄉記無心子傳臨終自剋死日預為墓誌有
文集五卷 呂才為王無功集序畧云君河中有渚
田十數頃又有隱士仲長子光服食養性君遂結廬
河渚貞觀中京兆杜之倫清河崔善為相繼為刺史
皆召之君曰奈
何坐召君平耶

五言古詩

春桂問答二首

問春桂桃李正芬華年光隨處滿何事獨無花

春桂答春華詎能久風霜搖落時獨秀君知不

答語六

朝餘秀

五言律詩

野望

東臯薄暮望徙倚欲何依樹樹皆秋色山山唯落暉收
人驅犢返獵馬帶禽歸相顧無相識長歌懷采薇

多於朴茂 詩自梁陳以來煜煜春華輝輝秋月
艷之一徑不可復過隋場雖返古道然華實並高

轉入初唐英華實頓盛唐
別轉風調即意味愈漓矣

五言絕句

過酒家

此日長昏飲非闕養性靈眼看人盡醉何忍獨為醒

唐人五絕病淺
淺則一覽便盡

上官儀

本傳云字游韶陝州人家於江都幼為沙門服
工文詞貞觀初舉進士授弘文館直學士遷祕

書即太宗雅好屬文每遣儀視草多令繼和凡有宴
集儀嘗與馮高宗立進西臺侍郎工於五言詩以綺
錯婉媚為本儀既貴顯人多倣之謂上官體儀頗恃
才任勢故為當代所嫉許敬宗構坐梁王忠事下獄
死有集

三十卷

五言古詩

早春桂林殿應詔

步輦出披香清歌臨太液
曉樹流鶯滿春堤芳草積
風色翻露文雪華上空碧
花蝶來未已山光暖將夕

語
脆

奉和潁川公秋夜

沈寥空色遠芸黃淒序變
涸浦落遵鴻長飈送巢燕
千秋流夕景萬籟含宵喚
峻雉聆金柝層臺切銀箭

清厲之音涸浦落遵鴻字太
着意萬籟合宵喚喚字亦特

李義府

本傳云其先瀛州人後家于永泰貞觀中除太子舍人與來濟俱以文翰見知時稱來李永徽

中拜中書侍郎封廣平縣男與人語必嬉怡微笑而
衽忌陰賊時人言其笑中有刀又以柔而害物亦謂
之李貓顯慶中為中書令進封河間郡公後楊行穎
表言罪狀流死嵩州史論言義府才思精密所謂程
言 程能

五言絕句

堂堂詞二首

鏤月為歌扇裁雲作舞衣自憐迴雪影好取洛川歸

唐新

語云義府嘗賦詩云鏤月為歌扇裁雲作舞衣照鏡自憐迴雪影來時好取洛川歸謂之活剝張昌齡生吞郭正一

活剝張昌齡
生吞郭正一
懶整鴛鴦被羞褰玳瑁牀春風別有意密處也尋香

輕脫 春風別有意密
處也尋香艷情太甚

詠烏

紀事云義府初遇以李大亮劉洎之薦太宗
召令詠烏云云帝曰與卿全樹何止一枝

日裏颺朝彩，琴中伴夜啼。上林如許樹，不借一枝栖。

薛元超

本傳云汾陰人收子也九歲襲爵汾陰男及長好學善屬文貞觀中累授太子舍人預撰晉書

高宗時拜中書令加金紫致仕卒有文集四十卷元超好引寒畯時論稱美紀事云上元初政出武氏

因陽暗乞

骸骨歸卒

五言排律

奉和同太子監守違纒

儲禁銅扉啓宸行，玉輅遙空懷壽街。吏尚隔寢門朝北，首瞻龍戟空中想。鳳鑣飛文映仙榜，瀝思叶神颺。帝念

紆蒼壁乾文煥紫霄雲塘橫碧海平圃振詞條欲應重

輪曲鏘洋韻九韶

平圃見山海經槐江之陽實惟帝之平圃

莊麗典則是初唐格調韓王元嘉同此奉

和地分丹鷲嶺塗間白雲鄉亦屬佳句

王勃

文苑傳云字子安絳州龍門人文中子通孫也六歲解屬文與兄勔勳才藻相類杜易簡稱之曰此

王氏三珠樹也勃年未及冠應舉及第沛王賢聞其名召為沛府脩撰戲為檄英王難文高宗覽之怒曰此是交構之漸出補虢州參軍父福峙坐勃故左遷交趾令勃往省父渡南海墮水卒初李敬玄稱勃與楊炯盧照隣駱賓王必當顯貴裴行儉曰勃等雖有才而浮躁淺露豈享爵祿楊稍沈靜應至令長餘得令終為幸果如其言紀事云勃為文先磨墨數升引被覆面而卧忽起書之初不加點時謂腹藁

四傑氣格雄渾
不以組繪為工

七言古詩

滕王閣

勃父為交趾令勃往省父道出洪都都督閻伯嶼
宴集滕王閣命之序蓋宿命其塔預成將舉屬客
必讓而及焉勃適至不
辭下筆立就末成四韻

滕王高閣臨江渚佩玉鳴鸞罷歌舞畫棟朝飛南浦雲
珠簾暮捲西山雨閒雲潭影日悠悠物換星移幾度秋
閣中帝子今何在檻外長江空自流

三四高迥實境自然不作籠蓋
語致文雖四韻氣足長篇

秋夜長

秋夜長殊未央月明露白澄清光層城綺閣遙相望遙
相望川無梁北風受節南鴈翔崇蘭委質時菊芳鳴環
曳珮出長廊為君秋夜擣衣裳織羅對鳳凰丹綺雙鴛
鴦調砧亂杵思自傷征夫萬里戍他鄉鶴闕音信斷龍
門道路長君在天一方寒衣徒自香

氣格嶒峻北風受節
南鴈翔語最古雅

採蓮曲

採蓮歸綠水芙蓉衣秋風起浪鳧飛桂棹蘭橈下長
浦羅裙玉腕輕搖櫂葉嶼花潭極望平江謳越吹相思
苦相思苦佳期不可駐塞外征夫猶未還江南採蓮今
已暮今已暮採蓮花渠今那必盡娼家官道城南把桑
葉何如江上採蓮花蓮花復蓮花花葉何稠疊葉翠本
羞眉花紅強似頰佳人不在茲悵望別離時牽花憐共
蒂折藕愛連絲故情無處所新物徒華滋不惜西津交

珮解還羞北海鴈書遲採蓮歌有節採蓮夜未歇正逢
浩蕩江上風又值徘徊江上月徘徊蓮浦夜相逢吳姬
越女何丰茸共問寒江千里外征客關山路幾重

中有
佳句

落花落

落花落落花紛漠漠綠葉青跗映丹萼與君徘徊上金
閣影拂粧階玳瑁筵香飄舞館茱萸幙落花飛撩亂入
中帷落花春正滿春人歸不歸落花度氛氳遠高樹落

花春已繁春人春不顧綺閣青臺靜且聞羅袂紅巾復
往還盛年不再得高枝難重攀試復旦遊落花裏暮宿
落花間與君落花院臺上起雙鬢

自梁陳餘音轉入
老秀 芳言如韻

五言律詩

銅雀妓

金鳳鄰銅雀漳河望鄴城君王無處所臺榭若平生舞
席紛何就歌梁儼未傾西陵松檟冷誰見綺羅情

子安才雄五言律往往有一氣渾成之勢律自不能拘得 看渠一意轉合視之平平擬之難到中
晚之視初唐六朝之
視漢魏俱若此矣

聖泉宴 并序

玄武山有聖泉焉浸淫歷數百千年乘巖泌湧接磴
分流下瞰長江沙堤石岸咸古人遺跡也茲乃青蘋
綠芰紫苔蒼蘚遂使江湖思遠寤寐寄託既而崇巒
左披石壑前縈丹嶠萬尋碧潭千頃松風唱響竹露
薰空瀟瀟乎人間之難遇也方欲以林壑為天籟琴

樽為日用嗟乎古今共逝方深川上之悲少長同遊
且盡山陰之樂盍題芳什共寫高情詩得泉字

披襟乘石磴列籍俯春泉
蘭氣薰山酌松聲韻野弦
影飄垂葉外香度落花前
興洽林塘晚重巖起夕煙

三四琢矣然琢而不傷其氣渾渾

別薛華

送送多窮路遑遑獨問津
悲涼千里道悽斷百年身心
事同漂泊生涯共苦辛
無論去與住俱是夢中人

率衷披寫絕不作詩思 末語解愁愁情轉甚
須知此等下語意味深厚後人便道出個中矣

重別薛華

明月沈珠浦秋風濯錦川樓臺臨絕岼洲渚亘長天旅
泊成千里棲遑共百年窮途惟有淚還望獨潛然

麻平晚行

百年懷土望千里倦遊情高低尋戍道遠近聽泉聲
葉纔分色山花不辨名羈心何處盡風急暮猿清

杜少府之任蜀州

城闕輔三秦風煙望五津與君離別意同是宦遊人海
内存知己天涯若比隣無為在岐路兒女共霑巾

此是高調讀之不
覺其高以氣厚故

春日還郊

閒情無默默攜杖赴巖泉草綠縈新帶榆青綴古錢魚
牀侵岸水鳥路入山煙還題平子賦花樹滿春田

三四語有風味人有問余二語何以佳余謂此二
語一似逢春而感一似遇物而興非徒為草榆詠
也

秋日別王長史

別路餘千里深恩重百年正悲西候日更動北梁篇野
色籠寒霧山光斂暮煙終知難再奉懷德自潛然

上巳浮江宴韻得遙字

上巳年光促中川興緒遙綠齊山葉滿紅洩片花銷泉
聲喧後澗虹影照前橋遽悲春望遠江路積波潮

紅洩片花銷

六朝餘緒

易陽早發

金定四石全言
卷一
飭裝侵曉月奔策候殘星危閣尋丹嶂迴梁屬翠屏雲
間迷樹影霧裏失峯形復此涼颼至空山飛夜螢

如此起句
是大家數

焦岸早行和陸四

侵星違旅館乘月戒征儔
複嶂迷晴色虛巖辨暗流
猿吟山漏曉螢散野風秋
故人渺何際鄉關雲霧浮

第六句最
是高韻

楊炯

文苑傳云華陰人幼聰敏善屬文舉神童為弘文館學士累遷詹事司直則天初生祖弟神讓事左

遷梓州司法參軍秩滿授盈川令為政嚴酷卒于官
炯與王勃盧照隣駱賓王以詞賦齊名稱為王楊盧
駱炯謂人曰吾愧在盧前恥居王後張說曰楊盈川
文思如懸河注水酌之不竭既優于盧亦不減王耻
居王後信然愧
在盧前謙也

五言律詩

從軍行

烽火照西京心中自不平
牙璋辭鳳闕鐵騎繞龍城
雪暗凋旗畫風多雜鼓聲
寧為百夫長勝作一書生

渾厚

字字錐兩悲稱

首尾圓滿殆無餘憾

劉生

卿家本六郡年長入三秦
白璧酬知己黃金謝主人
劍鋒生赤電馬足起紅塵
日暮歌鐘發喧喧動四隣

出塞

塞外欲紛紜雌雄猶未分明堂
占氣色華蓋辨星文二月河魁將
三千太乙軍大夫皆有志會是立功勳

折楊柳

邊地遙無極
征人去不還
秋容凋翠羽
別淚損紅顏
望

斷流星驛心馳
明月關葉砧
何處在楊柳
自堪攀

送臨津房少府

岐路三秋別
江津萬里長
煙霞駐征蓋
弦管促飛觴
階樹含斜日
池風泛早涼
贈言未終竟
流涕忽霑裳

三四
氣韶

送豐城王少府

愁結亂如麻
長天照落霞
離亭隱喬樹
溝水浸平沙
左尉才何屈
東關望漸賒
行看轉牛斗
持此報張華

三四

語老

送鄭州周司空

漢國臨清渭京城枕濁河居人下珠淚宿御促驪歌望
極關山遠秋深煙霧多唯餘三五夕明月暫經過

五言排律

送劉校書從軍

天將下三宮星門召五戎坐謀資廟畧飛檄佇文雄赤
土流星劔烏號明月弓秋陰生蜀道殺氣繞湟中風雨

何年別琴尊此日同離亭不可望溝水自西東

初唐排律最佳語語湊拍首四語一起
一按可謂壯甚殺氣繞澗中語帶俚氣

和騫右丞省中暮望

故事閒臺閣仙門藹已深
舊章窺複道雲幌肅重陰
玄律葭灰變青陽斗柄臨
年光搖樹色春氣繞蘭心
風響高牕度流痕曲岸侵
天民總樞轄人鏡辨衣簪
日暮南宮靜瑶華振雅音

附和劉侍郎入隆唐觀百果珠
為實羣峯錦作苔語殊勝麗

五言絕句

夜送趙縱

趙氏連城壁由來天下傳送君還舊府明月滿前川

末句人

景雙映

唐詩鏡卷一

欽定四庫全書

唐詩鏡卷二

明 陸時雍 編

初唐第二

盧照隣

文苑傳云字昇之范陽人博學善屬文初授鄧王府典籤王甚愛之謂人曰此吾之相如也後

拜新都尉因染風疾去官處太白山中以服餌為事
後疾轉篤徙居具茨山沈痼孳廢不堪其苦與親友
執別投潁水死 紀事云照隣居具茨山下自以為
高宗尚吏已獨儒武后尚法已獨黃老后封嵩山屢
聘賢士已獨廢
著五悲以自明

七言古詩

長安古意

長安大道連狹斜，青牛白馬七香車。
玉輦縱橫過主第，金鞭絡繹向侯家。
龍銜寶蓋承朝日，鳳吐流蘇帶晚霞。
百丈遊絲爭繞樹，一羣嬌鳥共啼花。
啼花戲蝶千門側，碧樹銀臺萬種色。
複道交牕作合歡，雙闕連甍垂鳳翼。
梁家畫閣天中起，漢帝金莖雲外直。
樓前相望不相知，陌上相逢詎相識。
借問吹簫向紫煙，曾經學舞度芳年。

得成比目何辭死願作鴛鴦不羨仙比目鴛鴦真可羨
雙去雙來君不見生憎帳額繡孤鸞好取門簾貼雙燕
雙燕雙飛繞畫梁羅幃翠被鬱金香片片行雲着蟬鬢
纖纖初月上鴉黃鴉黃粉白車中出含嬌含態情非一
妖童寶馬鐵連錢娼婦盤龍金屈膝御史府中烏夜啼
廷尉門前雀欲棲隱隱朱城臨玉道遙遙翠幃沒金堤
挾彈飛鷹杜陵北探丸借客渭橋西俱邀俠客芙蓉劍
共宿娼家桃李蹊娼家日暮紫羅裙清歌一轉口氛氲

金定世...
北堂夜夜人如月南陌朝朝騎似雲南陌北堂連北里
五劇三條控三市弱柳青槐拂地垂佳氣紅塵暗天起
漢代金吾千騎來翡翠屠蘇鸚鵡杯羅襦寶帶為君解
燕歌趙舞為君開別有豪華稱將相轉日回天不相讓
意氣由來排灌夫專權判不容蕭相專權意氣本豪雄
青虬紫燕坐生風自言歌舞長千載自謂驕奢凌五公
節物風光不相待桑田碧海須臾改昔時金階白玉堂
即今惟見青松在寂寂寥寥揚子居年年歲歲一牀書

獨有南山桂花發飛來飛去襲人裾

瑋麗中不乏風華當
在駱賓王帝京篇上

五言律詩

昭君怨

合殿恩中絕交河使漸稀
肝腸隨玉輦形影向金微
漢地草應綠胡庭沙正飛
願逐三秋鴈年年一度歸

折楊柳

倡樓啓曙扉楊柳正依依
鶯啼知歲隔條變識春歸
露

葉凝秋黛風花亂舞衣攀折將安寄軍中音信稀

上之回

回中道路險蕭關烽候多五營屯右地萬乘出西河單
于拜玉璽天子按雕戈振旅汾川曲秋風橫大歌

文翁講堂

錦里淹中館岷山稷下亭空梁無燕雀古壁有丹青槐
落猶疑市苔深不辨銘良哉二千石江漢表遺靈

槐落猶疑市
語有餘想

元日述懷

一作明
月引

筮仕無中秩歸耕有外臣
人歌小歲酒花舞大唐
春草色迷三徑風光動四隣
願得長如此年年物候新

五言排律

西使兼送孟學士南遊

地道巴陵北天山弱水東
相看萬餘里共倚一征蓬
零雨悲王粲清樽別孔融
徘徊聞夜鶴悵望待秋鴻
骨肉胡秦外風塵關塞中
唯餘劒鋒在耿耿氣成虹

嚴

綿州官池贈別

同賦
灣字

輜軒遵上國仙珮下靈關樽酒方無地
聯綫喜暫攀離言欲贈策高辯正連環
野逕浮雲斷荒池春草班殘花落古樹
度鳥入澄灣欲叙他鄉別幽谷有綿蠻

還赴蜀中貽示京邑遊好

藥宿花初滿章臺柳向飛如何正此日
還望昔多違悵別風期阻將乖雲會稀
斂衽辭丹闕懸旗陟翠微野禽

喧戍鼓春草變征衣
回顧長安道關山起夕霏

附首春貽京邑文士寂寂罷將迎門無車馬聲橫琴
答山水披卷聞公卿三四何等氣岸 過東山谷口

野老堪成鶴山神或化鳩日暮飡

龜殼天寒御鹿裘絕似庾信語

駱賓王

文苑傳云賓王少善屬文尤妙于五言詩嘗作
帝京篇當時以為絕唱然落魄無行好與博徒

遊高宗末為長安主簿坐贓左遷臨海丞怏怏失志

棄官去後與徐敬業作亂事敗伏誅 紀事云徐敬

業亂於揚州以賓王為府屬代敬業為檄武后請至

一杯之土未乾六尺之孤安在矍然曰誰為之或以

賓王對后曰宰相安得失此人敬業敗亡

命不知所終中宗時詔求其文得數百篇

七言古詩

帝京篇

山河千里國城闕九重門不覩皇居壯安知天子尊皇
居帝里峻函谷鷄野龍山侯甸服五緯連影集星躔八
水分流橫地軸秦塞重關一百二漢家離宮三十六桂
殿欽峯對玉樓椒房窈窕連金屋三條九陌麗城隈萬
戶千門平旦開複道斜通鳩鵲觀交衢直指鳳皇臺劍
履南宮入簪纓北闕來聲名冠寰宇文物象昭回鈎陳
肅蘭祀壁沼浮槐市銅羽應風迴金莖承露起校文天

祿閣習戰昆明水朱邸抗平臺黃扉通戚里平臺戚里
帶崇墉炊金饌玉待鳴鐘小堂綺帳三千戶大道青樓
十二重寶蓋雕鞍金絡馬蘭窻繡柱玉盤龍繡柱璇題
粉壁映鏘金鳴玉王侯盛王侯貴人多近臣朝遊北里
暮南隣陸賈分金將讌喜陳遵投轄正留賓趙李經過
密蕭朱交結親丹鳳朱城白日暮青牛紺幘紅塵度俠
客珠彈垂楊道倡婦銀鈎采桑路倡家桃李自芳菲京
華遊俠盛輕肥延年女弟雙飛入羅敷使君千騎歸同

心結縷帶連理織成衣春朝桂樽樽百味秋夜蘭燈燈
九微翠幌珠簾不獨映清歌寶瑟自相依且論三萬六千
是寧知四十九年非古來榮利若浮雲人生倚伏信難
分始見田竇相傾奪俄聞衛霍有功勳未厭金陵氣先
開石槨文朱門無復張公子灞亭誰畏李將軍相顧百
齡皆有待居然萬化成應改桂枝芳氣已銷亡栢梁高
宴今何在春去春來苦自馳爭名爭利徒爾為久留郎
署終難遇空掃相門誰見知當時一旦擅豪華自言千

載長驕奢倏忽搏風生羽翼須臾失浪委泥沙黃雀徒
巢桂青門遂種瓜黃金銷鑠素絲變一貴一賤交情見
紅顏宿昔白頭新脫粟布衣輕故人故人有湮淪新知無
意氣灰死韓安國羅傷翟廷尉已矣哉歸去來馬卿辭
蜀多文藻揚雄仕漢乏良媒三冬自矜誠足用十年不
調幾遭迴汲黯薪逾積孫弘閣未開誰惜長沙傅獨負

洛陽才

紀事云楊盈川之為文好以古人姓名連用號為點鬼簿宿王文好以數對如秦地重關一百

二漢家離宮三十六人號為筭博士又曰倏忽搏風生羽翼須臾失浪委泥沙宿王後與徐敬業興兵揚州大

敗逃死此
其識也

文章有言無韻即是死語如
帝京篇人謂之算博士亦可

五言律詩

冬日過故人任處士書齋

神交尚投漆虛室罷遊蘭
網積窻文亂苔深履迹殘
雪明書帳冷水靜墨池寒
獨此琴臺夜流水為誰彈

遊紫雲觀贈道士并序

余鄉國一辭江山萬里
昔年離別還同塞北之
鳧今

日歸來即似遼東之鶴先生情均得免忘筌之契已
深路是亡羊分歧之恨逾切不題短什何汰衷襟乎
碧落澄秋景玄門啓曙闌人疑列禦至容似令威還羽
蓋徒欣仰雲車未可攀祗應傾玉醴時許寄顏顏

遊靈公觀

靈峰標勝境神府枕通川玉殿斜連漢金堂迴架煙斷
風疎晚竹流水切寒弦別有青門外空懷玄圃仙

同辛簿簡仰酬思玄上人林泉

俗遠風塵隔春還初服遲林疑中散地人似上皇時芳
杜湘君曲幽蘭楚客詞山中有春草長似寄相思

送鄭少府入遼共賦俠客遠從戎

邊烽警榆塞俠客度桑乾柳葉開銀鏑桃花照玉鞍滿
月臨弓影連星入劍端不學燕丹客空歌易水寒

三四語色明媚却與五陵裘
馬相宜上句更自入手輕快

憲臺出繫寒夜有懷

獨坐懷明發長謠苦未安自應迷北叟誰肯問南冠生

死交情異殷憂歲序闌空餘朝夕鳥相伴夜啼寒

淡淡語含情無
限結語悲甚

在獄詠蟬 并序

余禁所禁垣西是法廳事也有古槐數株焉雖生意
可知同殷仲文之古樹聽訟斯在即周召伯之甘棠
每至夕照低陰秋蟬疎引發聲幽息有切嘗聞豈人
心異於曩時將蟲響悲於前聽嗟乎聲以動容德以
象賢故潔其身也稟君子達人之高行蛻其皮也有

仙都羽化之靈姿候時而來順陰陽之數應節為變
審歲用之機有目斯開不以道昏而昧其視有翼自
薄不以俗厚而易其真吟喬樹之微風韻姿天縱飲
高秋之墜露清畏人知僕夫路艱虞遭時微纒不哀
傷而自怨未搖落而先哀聞蟋蟀之流聲悟平反之
已奏見蟪蛄之抱影怯危機之未安感而綴詩貽諸
知己庶情沾物應哀弱羽之飄零道寄人知憫餘聲
之寂寞非謂文墨取代幽憂云爾

西陸蟬聲唱南冠客思侵那堪玄鬢影來對白頭吟露
重飛難進風多響易沈無人信高潔誰為表予心

大家語大略意
象深而物態淺

五言排律

靈隱寺

鷲嶺鬱岩堯龍宮鎖寂寥樓觀滄海日門對浙江潮桂
子月中落天香雲外飄捫蘿登塔遠剝木取泉遙霜薄
花更發冰輕葉互凋夙齡尚遐異搜對滌煩囂待入天

台路看余度石橋

詩話云舊說徐敬業敗與賓王俱不
死皆去為浮屠以免賓王居杭州靈

隱寺後宋之問遊寺夜吟云驚嶺鬱岩堯龍宮鎖寂寥
久不能續有老僧云何不道樓觀滄海日門對浙江潮
云云遲明僧不見人以為賓王也今此詩乃見賓王集
集乃見古本非後人所哀次則此詩已自錄於集中賓
王之不死亦一證也

精警瑰麗
絕冠初唐

夕次蒲類津

二庭歸望斷萬里客心愁
山路猶南屬河源自北流
晚風連朔氣新月照邊秋
竈火通軍壁烽煙上戍樓
龍庭

但苦戰燕領會封侯莫作蘭山下空令漢國羞

新月照邊秋
語有爽氣

邊城落日

紫塞流沙北黃圖灞水東一朝辭俎豆萬里逐沙蓬
候月恒持滿尋源屢鑿空野昏邊氣合烽迴戍煙通
膂力風塵倦疆場歲月窮河流控積石山路遠崆峒
壯志凌蒼兕精誠貫白虹君恩如可報龍劍有雌雄

宿溫城望軍營

金定四庫全書
卷二
虜地寒膠折邊城夜柝聞兵符闕帝闕天策動將軍塞
靜胡笳徹沙明楚練分風旗翻翼影霜劍轉龍文白羽
搖如月青山斷若雲煙踈疑卷幔塵滅似銷氛投筆懷
班業臨戎想顧勳還應雪漢恥持此報明君

邊夜有懷

漢地行逾遠燕山去不窮城荒猶築怨碣毀尚銘功古
戍煙塵滿邊庭人事空夜關明隴月秋塞急胡風倚伏
良難定榮枯豈易通旅魂勞泛梗離恨斷征蓬蘇武封

猶薄崔駟宦不工惟餘北叟意欲寄南飛鴻

三四
警

五言絕句

於易水送人

此地別燕丹壯士髮衝冠昔時人已去今日水猶寒

附秋風亂竹搖疎影縈池織細流秋月裊露珠暉冷
凌霜桂影寒秋水圖雲錦色淨寫月練文明極組織
之工然皆借襯得來不若秋鴈陣
去金河冷書歸玉塞寒本色自在

劉禕之

本傳云字希美晉陵人少與孟利貞高智周郭
正一俱以文藻知名號為劉孟高郭上元中與

元萬頃等偕召入禁中論次新書高宗又密令參決
時政以分宰相之權時謂北門學士武后時為鳳閣
侍郎後以
罪賜死

五言古詩

酬鄭沁州

騏閣一代良熊軒千里躡緝圖昭國典按部留宸矚匪
厭承明廬佇兼司隸局芸書暫輟載竹使方臨俗節變
風緒高秋深露華溽寒山斂輕靄霽野澄初旭已切長
年悲誰堪歧路促遙林征馬迅別館嘶驂跼雅贈響攄

金索居睽倚玉悽斷離鴻引勞歌思足曲

語氣

亦貴

郭正一

文苑傳云彭城人貞觀中舉進士永淳中歷官至中書侍郎明習舊事兼有詞學號為稱職永

昌中為酷吏所
陷流死嶺南

五言律詩

奉和太子納妃太平公主出降

桂宮初服冕蘭掖早升筭禮盛親迎晉聲芬出降齊金
龜開瑞鈕寶翟上仙梯轉扇承宵月揚旌照夕蜺

新整簇簇是

初唐體裁

附劉禕之奉和 夢梓光青陞穠桃靄紫宮德優宸
念遠禮備國姻崇萬戶聲明發三條騎吹通香輪送

重景綵旆引仙虹

附任奉古奉和

帝子升青陸王姬降紫宸星光移

雜珮月彩薦重輪龍旌翻地杪鳳管颺天濱
棧陰浮淺瀨徐吹翼輕塵

附裴守真奉和

瑜珮升青殿濃華降紫微選如桃

李發更似鳳凰飛金屋真離象瑤臺起發微綵纓紛
碧坐續羽泛禴衣
極一時絢藻之致

于季子

咸亨中登進士第見紀事

七言律詩

早春洛陽答杜審言

梓澤年光往復來，杜霸遊人去不迴。
若非載筆登麟閣，定是吹簫伴鳳臺。
路傍桃李花猶嫩，波上芙蓉葉未開。
分明寄語長安道，莫教留滯洛陽才。

此詩雖格力未整，風味却饒。

附詠雲 瑞雲千里映祥輝，四望新隨風亂鳥足。泛水結魚鱗，布葉疑臨夏。開花詎待春，願得承嘉景。無令掩桂輪，是孔範諸人。餘意巧力邪及古人。

附詠項羽北伐，雖全趙東歸，不王秦空歌拔山力。羞作渡江人。余謂項羽雖霸業不終，亦千古一猛男子。

金史卷之八十一
卷二
嘲之何為直當閔之耳詠漢高祖百戰方夷項三章
且代秦功歸蕭相國氣盡戚夫人未語誠當以萬乘
之尊不能庇
一弱子何也

楊衡

七言古詩

白紵辭二首

玉纓翠珮雜輕羅香汗微漬朱顏酡為君起唱白紵歌
清聲裊雲思繁多凝笳哀琴時相和金壺半傾芳夜促
梁塵霏霏暗紅燭令君安坐聽終曲陸葉飄花難再復

躡珠履步瓊筵輕身起舞紅燭前
芳姿艷態妖且妍迴眸轉袖暗催
弦涼風蕭蕭漏水急月華泛灩紅蓮
濕牽

裙攬帶翻成泣

殊有

艷情

劉允濟

文苑傳云洛川人少孤事母甚謹博學善屬文與王勃齊名弱冠舉進士累除著作佐郎撰魯

後春秋二十卷上之遷左史直弘文館垂拱中明堂初成奏賦以諷拜著作郎長安中拜鳳閣舍人坐與張易之款狎左授青州長史

五言古詩

經廬岳迴望江州想洛陽有作

龜山帝始營龍門禹初鑿出入經變化俯仰憑寥廓未
若茲山功連延並巫霍東北疏艮象西南距坤絡宏阜
自鬱盤高堙復迴薄勢入柴桑渚陰開彭蠡壑九江杳
無際七澤紛相錯雲霞散吳會風波騰鄢鄂跡隨造化
久利與乾坤博盼蠻精氣通紛綸潛怪作石渠忽見踐
金房安可託地入天子都巖有仙人藥二門幾迢遞三
宮何儵爚咫尺窮杳冥跬步皆恬漠林驚羽翰幽居靜

龍蛇蠖明牧振雄詞棣華殊灼灼盛業匡西夏深謀贊
禹毫黃雲覆鼎飛絳氣橫川躍佐歷符賢運人期茂天
爵禮樂富垂髻詩書成舞勺清輝靖岳電利器騰霜鏐
遊聖挹衢樽鄰畿恭木鐸牆切已武侯波瀾控文若旋
聞刈薪楚遽覩升葵藿稷高序揆圖良平公輔略重臣
資出守英藩諒求瘼豫章觀偉材江州訪靈嶧陽岫曉
氛氲陰崖暮蕭索雌伏屢鯨奔雄飛更鷲搏驚獮透煙
霞騰猿亂枝格音洛故園有歸夢他山非行樂帝鄉徒可

遊渥澗終旅泊景物觀淮海雲霄望河洛城闕紫微星
圖書玄扈閣神功多粉績元氣猶斟酌丞相下南宮將
軍趨北落橫簪並附蟬列鼎俱調鶴四郊時迷路五月
先投滸池榭宣瓊管風花亂珠箔舊遊勞夢寐新知無
悅樂天寒欲贈言歲暮期交約夜琴清玉柱秋灰變緹
幕風雲動翰林宮徵調文箒言泉激為浪思緒飛成繳
千里輝珠璣五采含丹雘鐘鼓旋驚鷗瑾瑜俄抵鵲竊
價慙庸怠叨聲逾寂寞長望限南溟居然翳東郭

麗宏

五言律詩

怨情

玉關芳信斷蘭閨錦字新
愁來不自抑念切已含嚔
虛牖風驚夢空牀月厭人
歸期倘可促勿度柳園春

語態

愀愀

鄭蜀賓

榮陽人

五言絕句

別親朋

紀事云蜀賓年老為江左一尉親朋餞於上東門
蜀賓賦詩云云酒酣自詠聲調哀戚竟卒于官

畏途方萬里生涯近百年不知將白首何處入黃泉

韋承慶

字延休陽武人少恭謹事繼母以孝聞舉進士
補雍王府參軍府中文翰恚出其手長壽中累

遷鳳閣舍人以後三掌天官選事銓授平允海內稱
之後知政事坐附推張昌宗失實流嶺表歲餘起辰
州刺史入為秘書少監封扶陽縣子遷黃門侍郎未
拜卒紀事云韋氏孝友詞學則承慶嗣立遂音樂
有萬石達禮儀則叔夏史才博識有述時趙冬
曦兄弟亦各有名張說曰韋趙兄弟人之梓杞

五言古詩

折楊柳

萬里邊城地三春楊柳節
葉似鏡中眉花如關外雪
征人遠鄉思倡婦高樓別
不忍擲年華含情寄攀折

三四言
之可念

五言律詩

寒食應制

鳳城春色晚龍禁早暉通
舊火收槐燧餘寒入桂宮
鶯啼正隱葉鷄鬪始開籠
藹藹瑤山滿仙歌始樂風

三四語
氣清貴

韋嗣立

鄭州人思謙子也少舉進士與兄承慶俱以學行齊名長壽中為鳳閣舍人長安中為天官侍

郎遷鳳閣侍郎知政事神龍中為黃門侍郎前後四職兄弟相代又父子三人皆至宰相有唐以來莫與為比嘗於驪山構別業中宗親往幸焉因封為逍遙公睿宗立拜中書令為憲司所劾左遷岳州別駕遷陳州刺史卒見思謙傳

五言排律

偶遊龍門北谿忽懷驪山別業因以言志示弟

淑奉呈諸大僚

幽谷杜陵邊風煙別幾年
偶來伊水曲谿嶂各依然
傍浦憐芳樹尋崖愛綠泉
嶺雲隨馬足山鳥向人前
地合心俱靜言因理自玄
短才叨重寄尸祿愧妨賢
每挹挂冠侶思從初服旋
稻粱仍欲報歲月坐空捐
助岳無纖塊輸溟謝未涓
還悟北轅失防求南礪田

嶺雲隨馬足山鳥向人前語極自然之致較李太白山從人面起雲傍馬頭生似覺高雅一籌

東方虬

紀事云武后時為左史嘗曰百年後可與西門豹作對

五言絕句

昭君怨

漢道方全盛朝廷足武臣何須薄命妾辛苦事和親
揜淚辭丹鳳銜悲向白龍單于浪驚喜無復舊時容

好意

蘇味道

本傳云趙州樂城人與鄉人李嶠以文辭知名時謂蘇李弱冠舉進士累轉咸陽尉延載中遷

鳳閣侍郎證聖元年坐事出為集州刺史俄召拜天官侍郎聖歷初復同鳳閣鸞臺三品前後居相位數載多識臺閣故事但事無決斷人號為蘇摸稜坐張易之黨貶眉州卒有集十五卷行世

五言律詩

單于川對雨

飛雨欲迎旬浮雲已送春
還從濯枝後來應洗兵辰氣
合龍祠外聲過鯨海濱
伐邢知有屬已見靜邊塵

霏微和美
諷有餘味

正月十五夜

唐新語云神龍之際京城正月望日盛飾燈火之
會金吾弛禁貴遊戚屬及下俚工賈無不夜遊車
馬駢闐人不得顧王主之家馬上作樂以相誇競
文士皆賦詩以紀其事作者數百人唯味道與郭
利貞崔液三人為絕唱三

金匱要略卷之三
火樹銀花合星橋鐵鎖開暗塵隨馬去明月逐人來遊
伎皆穠李行歌盡落梅金吾不禁夜玉漏莫相催

纖濃

恰中

附詠虹詠霜俱勻密可諷 詠虹 紆餘帶星渚窈
窕架天濶空因壯士見還共美人沈逸照含良玉神
花藻瑞金獨留長劍采終負昔賢心 詠霜 金祇
暮律盡玉女暝氛歸孕冷隨鐘徹飄華透劍飛帶日
浮寒影乘風進晚咸自
有貞筠質寧將庶草腓

五言排律

在廣州聞崔馬二御史並拜臺郎

振鷺纓飛日遷鶯遠聽聞明光共待漏清鑿各披雲喜
得廊廟舉嗟為臺閣分故林懷栢悅新幄阻蘭薰冠去
神羊影車迎瑞雉羣遠從南斗外遙仰列星文

精密 起伏轉
合一絲不漏

十五夜遊

今夕重門啓遊春得夜芳月華連晝色燈影雜星光南
陌青絲騎東隣紅粉粧管絃遙辨曲羅綺暗聞香人擁
行歌路車攢關舞場經過猶未已鐘鼓出長楊

輕歎熨帖
語帶微芳

附和武三思於天中寺尋復禮上人之作 藩戚三
雍暇禪居二室隈忽聞從桂苑移步踐花臺敏學推
多藝高談屬辯才是非寧滯着空有掠嫌猜五行幽
機暢三蕃妙鍵聞味同甘露灑香似逆風來砌古留
方石池清辨燒灰人尋鶴洲返月逐虎谿迴企躅
瞻飛蓋攀遊想澆杯願陪為善樂從此去塵埃

崔融

本傳云字安成齊州人擢八科高第為崇文館學
士中宗在東宮選為侍讀典東朝表疏長安中為

鳳閣舍人坐附張易之兄弟左授袁州刺史尋拜國
子司業預脩則天實錄封清河縣子融為文典麗朝
廷諸大手筆多手勅委之撰哀冊文用
思精苦遂發病卒謚曰文有集六十卷

五言律詩

詠寶劍

寶劍出昆吾，龜龍夾采珠。
五精初獻術，千戶競論都。
匣氣衝牛斗，山形轉轆轤。
欲知天下貴，持此問風胡。

三四

典貴

五言排律

和梁王衆傳張光祿是王子晉後身

武后改控鶴府為奉宸府，引詞人為供奉內殿，曲宴則二張諸武侍坐，佞者奏云：張昌宗是王子晉後身，令被羽衣吹簫，采木鶴奏樂於庭。如子晉采空融賦詩為絕唱，見張易之傳。

聞有冲天容披雲下帝畿三年上賓去千載忽來歸昔
偶浮丘伯今同丁令威中郎才貌是柱史姓名非祇召
趨龍闕承恩拜虎闈丹成金鼎獻酒至玉杯揮天仗分
旄節朝容間羽衣舊壇何處所新廟坐光輝漢主存僊
要淮南愛道機朝朝緱氏鶴長向洛城飛紀事云融嘗
與蘇味道相
誦云某詩所以不及相公無銀花盒也蘇有詩云火樹
銀花合味道云子詩雖無銀花合還有金銅丁取融詩
有今同丁
令威句也

才情
綺合

唐詩鏡卷二

欽定四庫全書

唐詩鏡卷三

明 陸時雍 編

初唐第三

張易之

定州人初以門蔭累遷為尚乘奉御白晳美姿容善音律則天臨朝入侍禁中為奉宸府令加

麟臺監封恒國公神龍元年則天病甚崔玄暉等斬於迎仙院易之兄弟粗能屬文如應詔和詩則宋之問閻朝隱為之代作見張行成傳

五言律詩

泛舟侍宴應制

平明出御溝，解纜坐迴舟。
綠水澄明月，紅羅結綺樓。
弦歌爭浦入，冠蓋逐川流。
白魚臣作伴，相對舞王舟。

三四麗
色天成

武三思

元慶子，以后族累轉右衛將軍。則天革命，封梁王。進拜持進性，傾巧便僻，善事人。中宗立，復得

幸，掌知國政。既與韋庶人上官昭容私，通嘗忌節愍太子，密謀廢之。太子率羽林軍誅之。

五言排律

奉和春日遊龍門應制

鳳駕臨香地龍輿上翠微
星宮含雨氣月殿抱春暉
碧澗長虹下雕梁早燕歸
雲疑浮寶蓋石似拂天衣
露草侵堦長風花遶席
飛日斜宸賞洽清吹入重闈

氣爽

附奉和宴小山池柳發龍鱗
出松新麈尾齊亦屬佳句

喬知之
文苑傳云馮翊人有俊才所作篇詠人多諷誦
則天時累除右補闕遷左司郎中以婢事後為

武承嗣諷酷吏羅織殺之

五言古詩

長信宮中樹

婀娜當軒樹，丰茸倚蘭殿。色艷九春時，風搖五明扇。餘
花鳥弄畫新，葉蟲書遍零。落心自知芳，菲君不見。

五六
語俊

薛稷

字嗣通，蒲州汾陰人。舉進士，累轉中書舍人。與從

祖兄曜俱以辭學知名。同在兩省，為時所稱。景龍
中，為昭文館學士。好古博雅，尤工隸書。睿宗即位，拜
中書侍郎參知政事。後以翊贊功封晉國公。除太子
少保。睿宗嘗召入宮中，參決庶政。恩遇莫比。竇
懷貞伏誅，稷以知其謀，賜死。萬年獄見薛收傳。

七言律詩

奉和聖製春日幸望春宮應制

九春風景足林泉四面雲霞敞御筵
花鏤黃山繡作苑草圖玄灞錦為川
飛鷁競醉心迴日走馬爭先眼着鞭
喜奉仙遊歸路遠直言行樂不言旋

語饒
巧思

陳子昂

文苑傳云字伯玉射洪人家世豪富子昂獨苦節讀書金華山善屬文舉進士拜麟臺正字轉

右拾遺數上疏陳事詞皆典美武攸宜統軍北討契丹以子昂為管記聖歷初解官歸為縣令段簡因事收繫憂憤卒子昂褊躁無威儀然文詞宏麗當時重之有集十卷紀事云子昂與趙貞固盧藏用杜審

言宋之問畢隆澤郭襲微司馬承禎釋懷一陸餘慶
號方外十友 獨異記云子昂初入京不為人知有
賣胡琴者價百萬子昂突出謂左右曰輦千緡市之
衆驚問答曰余善此樂皆曰可得聞乎曰明日可集
宣陽里如期偕往則酒肴畢具捧琴語曰蜀人陳子
昂有文百軸不為人知此樂賤工之後豈宜留心舉
而碎之以其文百軸徧贈
會者一日之內聲華溢都

阮籍詠懷出自深衷子昂感遇情已虛設言復不
文雖云不乏風骨然此是頑骨不靈也其詩三十
八首余謂首
首俱可省得

五言古詩

秋園卧病呈暉上人

幽寂曠日遙林園轉清密疲疴澹無豫獨坐汎瑤瑟懷
挾萬古情憂虞百年疾綿綿多滯念忽忽每如失緬想
赤松遊高尋白雲逸榮吝始都喪幽人遂貞吉圖書紛
滿牀山木鶻盈室宿昔心所尚平生自茲畢願言誰見
知梵筵有同術八月高秋晚涼風正蕭瑟

此詩絕無霸

氣似為近雅

五言律詩

晚次樂鄉縣

故鄉杳無際日暮且孤征川原迷舊國道路入邊城野
戍荒煙斷深山古木平如何此時恨嗷嗷夜猿鳴

古澆

同王員外雨後登開元寺南樓因酬暉上人獨
坐山亭有贈

鐘梵經行罷香林坐入禪巖庭交雜樹石瀨瀉鳴泉水
月心方寂雲霞思獨玄寧知人世裏疲病得攀緣

送客

故人洞庭去楊柳春風生相送河洲晚蒼茫別思盈白
蘋已堪把綠芷復含榮江南多桂樹歸客贈生平

三四

韻

春夜別友人

銀燭吐青煙金樽對綺筵離堂思琴瑟別路遠山川明
月隱高樹長河沒曉天悠悠洛陽去此會在何年

氣滿 老而勁明月

長河於秋時尤勝

五言排律

金少巳五
卷三
白帝城懷古

日落滄江晚停橈問土風城臨巴子國臺沒漢王宮荒
服仍周甸深山尚禹功巖懸青壁斷地險碧流通古木
生雲際孤帆出霧中川途去無限客思坐何窮

古木生雲際孤帆出
霧中景色寫入霏微

峴山懷古

秣馬臨荒甸登高覽舊都猶悲墮淚碣尚想卧龍圖城
邑遙分楚山川半入吳丘陵徒自出賢聖幾凋枯野樹

蒼煙斷津樓晚氣孤誰知萬里客懷古正踟躕

野樹蒼煙斷津樓晚氣孤語氣高古
子昂古色蒼茫淡淡寫意其趣已足

杜審言

文苑傳云字必簡襄陽人舉進士為隰城尉雅
善五言詩工書翰恃才寡傲為世所嫉嘗謂人

曰吾文章合得屈宋作衙官吾書跡合得王羲之北
面則天召見累遷膳部員外郎神龍初坐通張易之
兄弟流峰州入為修文館學士卒與李
嶠崔灝蘇味道為文學四友文集十卷

審言材力雄厚復椎鍊精工

詩之有眼意欲攝長情於短韻鑄浩景於微言其
法始於宋之謝靈運而成於梁之庾肩吾陳之張
正見諸人也古人平鋪直述未嘗不佳自晉人繁
縟日增謝靈運始生字法誠欲探境窮微追情入
妙然非本來靈妙別具蘊錘未易登其堂與也唐

時追珍大盛於垂拱神龍之間而窮於賈島
諸人之輩安得直據真境一遊大雅之場乎

五言律詩

蓬萊三殿侍宴奉敕詠終南山應制

北斗掛城邊南山倚殿前雲標金闕迴樹杪玉堂懸半
嶺通佳氣中峰繞瑞煙小臣持獻壽長此戴堯天

掛倚字稍帶粗氣三

四結構語氣鄭重

宿羽亭侍宴應制

步輦千門出離宮二月開風光新柳報宴賞落花催碧

水揉空閣青山繞吹臺聖情留晚興歌管送餘杯

賦得妾薄命

草綠長門掩苔青永巷幽寵移新愛奪淚落故情留啼
鳥驚殘夢飛花攪獨愁自憐春色罷團扇復迎秋

輕輕款款裊裊亭亭絕似當年愁緒三四蕊色
溫香却無梁人妖氣庶幾雅音淚落故情留語最
溫厚蓋怨生於愛若拋却即多無事矣今日之
淚皆當年恩愛所留知中之所包有幾許在

和韋承慶過義陽公主山池

逕轉危峰逼橋迴缺岼妨玉泉移酒味石髓換稜香綰

霧青絲弱牽風紫蔓長猶言宴樂少別向後池塘

和晉陵陸丞早春遊望

獨有宦遊人偏驚物候新雲霞出海曙梅柳渡江春淑
氣催黃鳥晴光轉綠蘋忽聞歌古調歸思欲霑巾

三四如精金百鍊雲霞出海曙梅柳渡江春曙
春一字一句古人琢意之妙起結意勢沖盈

秋夜宴臨津鄭明府宅

行止皆無地招尋獨有君酒中堪累月身外即浮雲露
白宵鐘徹風清曉漏聞坐攜餘興往還似未離羣

和康五庭芝望月有懷

明月高秋迴愁人獨夜看暫將弓並曲翻與扇俱團露
濯清輝苦風飄素影寒羅衣一此鑒頓使別離難

五六思苦不借影襯獨披本相
意境最老結語矜重韻亦沈老

登襄陽城

旅客三秋至層城四望開楚山橫地出漢水接天迴冠
蓋非新里章華即舊臺習池風景異歸路滿塵埃

旅寓安南

交趾殊風候寒遲暖復催仲冬山果熟正月野花開積
雨生昏霧輕霜下震雷故鄉踰萬里客思倍從來

即景自成
入手輕快

送郎中北使

北狄願和親東京發使臣馬銜邊地雪衣染異方塵歲
月催行旅恩榮變苦辛歌鐘期重錫拜手落花春

起結有體語語老氣當家恩
榮變苦辛語從意鍊得來

送崔融

君王行出將書記遠從征祖帳連河關軍麾動洛城旌
旃朔氣笳吹夜邊聲坐覺煙塵掃秋風古北平

經行嵐州

北地春光晚邊城氣候寒往來花不發新舊雪仍殘水
作琴中聽山疑畫裏看自驚牽遠役艱險促征鞍

三四實境自在五六旅塗漫興語豈愛其山水之佳耶

春日懷歸

心是傷歸望春歸異往年河山鑿魏闕桑梓憶秦川花

金人元好問詩集卷三
雜芳園鳥風和綠野烟更懷歡賞地車馬洛橋邊

除夜有懷

故節當歌守新年把燭迎冬氛戀虬箭春色候鷄鳴興
盡聞壺覆宵闌見斗橫還將萬億壽更謁九重城

三四語

氣高凝

代張侍御傷美人

二八泉扉掩帷屏寵愛空淚痕銷夜燭愁緒亂春風巧
笑人疑在新粧曲未終應憐脂粉氣猶着舞衣中

七言律詩

守歲侍宴應制

季冬除夜接新年，帝子王孫捧御筵。
宮闕星河低拂樹，殿庭燈燭上薰天。
彈絃奏節梅風入，對局探鈎柏酒傳。
欲向正元歌萬壽，暫留歡賞寄春前。

附大舖梅花落處疑殘雪，柳葉開時任好風。不惟風味之佳，氣格亦是絕勝。大略渾成之後，必生做作。做作不已，琢雕遂深，觀自初至晚，可概見矣。

五言排律

金匱要略卷之三
卷三
扈從出長安應制

分野都畿列時乘六御均京師舊西幸洛道此東巡文
物驅三統聲名走百神龍旗縈漏夕鳳輦拂鈎陳撫迹
地靈古游情皇鑒新山追散馬日水憶釣魚人禹食傳
中使堯樽遍下臣省方稱國阜問道識風淳歲晚天行
吉年豐景從親歡娛包歷代宇宙忽疑春

凝厚中復得
挺勁之致

贈蘇味道

北地寒應苦南庭戍未歸邊聲亂羌笛朔氣卷戎衣雨
雪關山暗風霜草木稀胡兵戰欲盡漢卒尚重圍雲淨
妖星落秋深塞馬肥據鞍雄劍動搖筆羽書飛輿駕還
京邑朋游滿帝畿方期來獻凱歌舞共春輝

據鞍雄劍動搖筆
羽書飛語有生韻

度石門山

石門千仞斷迸水落遙空道束懸崖半橋欹絕磴中仰
攀人屨息直下騎纔通泥擁奔蛇徑雲埋伏獸叢星躔

牛斗北地脉象牙東開塞隨行變高深觸望同江聲連
驟雨日氣抱殘虹未改朱明律先舍白露風堅貞深不
憚險澁諒難窮有異登臨賞徒為造化功

江聲連驟雨日氣抱殘虹語氣精湛春日
江津烟銷垂柳弱霧卷落花輕亦屬佳句

七言絕句

渡湘江

遲日園林悲昔遊今春花鳥作邊愁獨憐京國人南竄
不似湘江水北流

劉希夷

文苑傳云汝州人善為從軍閨情之詩詞調哀苦為時所重志行不修為姦所殺 唐新語云

希夷一名庭芝孫翌撰正聲集以希夷詩為集中之最由是大為時人所稱

七言古詩

公子行

天津橋下陽春水天津橋上繁華子馬聲迴合青雲外
人影搖動綠波裏綠波清迴玉為砂青雲離披錦作霞
可憐楊柳傷心樹可憐桃李斷腸花此日遨遊邀美女
此時歌舞入娼家娼家美女鬱金香飛去飛來公子傍

的的珠簾白日映娥娥玉顏紅粉妝花際
襄徧雙蛺蝶池邊顧步兩鴛鴦
傾國傾城漢武帝為雲為雨楚襄王
古來容光人所羨况復今日遙相見
願作輕羅着細腰願為明鏡分嬌面
與君相向轉相親與君雙棲共一身
願作貞松千歲古誰論芳槿一朝新
百年同謝西山日千秋萬古北邙塵

願作二語是

簡闌情之雋

代悲白頭翁

洛陽城東桃李花飛來飛去落誰家洛陽兒女惜顏色
坐見落花長歎息今年花落顏色改明年花開復誰在
已見松柏摧為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言全盛紅顏子應憐半死白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺開錦繡將軍樓閣畫神仙一朝卧病無相識
三春行樂在誰邊宛轉蛾眉能幾時須臾鶴髮亂如絲

但看古來歌舞地惟有黃昏鳥雀悲

唐新語云希夷善琵琶嘗為白頭詠

云今年花落顏色改明年花開復誰在既而悔曰我此詩似讖與石崇白首同所歸何異乃更作云年年歲歲花相似歲歲年年人不同既而歎曰復似向讖矣詩成未周歲為姦人所殺或云宋之問害希夷而以白頭翁

之篇為已作至今有載此篇在之問集中

初唐七言古風拘攣纏束有氣不舒有意不展又皆一切支應語何嘗披胸豁膽一伸眉目於人前耶天家四六余嘗號之文奴如劉希夷公子行等篇謂之詩奴亦可昔傳宋之問愛代悲白頭翁篇害希夷而竊為己有則亦枉殺此人矣讀其詩知其為輕薄人

唐詩鏡卷三

欽定四庫全書

集部
唐詩鏡卷八
四至

詳校官庶吉士臣范逢恩

主事銜臣徐以坤覆勘

總校官編修臣王燕緒

校對官中書臣孫溶

謄錄監生臣趙興昱

欽定四庫全書

唐詩鏡卷四

明 陸時雍 編

初唐第四

李嶠

本傳云字巨山趙州人兒童時夢神人遺之雙筆自是漸有學業弱冠舉進士累轉監察御史轉鳳

閣舍人朝廷每有大手筆皆嶠為之聖歷初遷鸞臺

侍郎知政事神龍中拜吏部尚書封趙國公景龍中

以持進守兵部尚書同中書門下三品睿宗立出刺

懷州欽仕卒有文集五十卷紀事云嶠初與王楊

接踵中與崔蘇齊名晚諸人沒獨為文章宿老一時

學者取法焉人云嶠有三戾性好榮遷憎人陞進好

文章憎人才華性
貪濁憎人受賂

五言古詩

奉使築朔方六州城率爾而作

奉詔受邊服總徒築朔方驅彼羶裘族正此戎夏疆
子來多悅豫王事寧息遑三旬無愆期百雉鬱相望
雄視沙漠垂有截北海陽二庭已頓顙五嶺盡來王
驅車登崇墉顧眄凌大荒千里何蕭條草木自悲涼
憑軾訊古今慨焉感興亡漢障緣河遠秦城入海長
顧無廟堂策

貽此中夏殃道隱前業哀運開今化昌制為百王式舉
合千載防馬牛被路隅鋒鏑銷戰場豈不懷賢勞所圖
在永康王事何為者稱代陳頌章

真宏鉅手

隱有古意

早發苦竹館

合沓巖嶂深朦朧煙霧曉荒阡下樵客野猿驚山鳥開
門聽潺湲入徑尋窈窕棲鷗抱寒木流螢飛暗篠早霞
稍霏霏殘月猶皎皎行看遠星稀漸覺遊氛少我行撫

貂傳兼得傍林沼貪翫水石奇不知川路渺徒憐野心
曠詎測浮年小方解寵辱情永託累塵表

照出景色
大有作意

七言古詩

汾陰行

君不見昔日西京全盛時汾陰后土親祭祠齋宮宿寢
設儲供撞鐘鳴鼓樹羽旂漢家四葉才且雄賓延萬靈
服九戎栢梁賦詩高宴罷詔書法駕幸河東河東太守

親掃除奉迎至尊尊鑾輿五營夾道列容衛三河縱觀
空里問迴旌駐蹕降靈場焚香奠醑邀百祥金鼎發色
正焜煌靈祇煒煜攄景光埋玉陳牲禮神畢舉麾上馬
乘輿出彼汾之曲嘉可遊木蘭為檝桂為舟棹歌微吟
綵鷁浮簫鼓哀鳴白雲秋歡娛宴洽賜羣后家家復除
戶牛酒聲明動天樂無有千秋萬歲南山壽自從天子
向秦關玉輦金車不復還珠簾羽扇長寂寞鼎湖龍髯
安可攀千齡人事一朝空四海為家此路窮雄豪意氣

今何在壇場宮館盡蒿蓬路逢故老長歎息世事回環
不可測昔時青樓對歌舞今日黃埃聚荊棘山川滿目
淚沾衣富貴榮華能幾時不見祗今汾水上唯有年年

秋鴈飛

明皇傳信記云上將幸蜀登華萼樓使樓前善水調者登而歌至山川滿目云云上顧侍者曰

誰為此曰宰相李嶠辭也上曰真才子也不待曲終而去

五言律詩

中宗降誕日長寧公主滿月侍宴應制

神龍見像日仙鳳養雛年大火乘天正明珠對月圓祚

延金篋裏歌奏玉筐前今日宜孫慶還參祝聖篇

李嶠詩如富家子金裝玉相滿
身是富貴氣色 三四瑋麗

侍宴長寧公主東莊應制

紀事云長寧公主韋庶人所生下嫁楊慎造第東
都府財幾竭又取西京高士廡第左金吾衛廢營
合為宅作三重樓築山浚池帝及后數
臨幸置酒賦詩嶠等屬和即東莊也

別業臨青甸鳴鸞降紫霄長筵鷓鴣集仙管鳳凰調樹
接南山近煙含北渚遙承恩咸已醉戀賞未還鑣

甘露殿侍宴應制

金史四八
卷四
月宇臨丹地雲牕網碧紗御筵陳桂醑天酒酌榴花水
向浮橋直城連禁苑斜承恩恣歡賞歸路滿煙霞

三四矜貴五六賦景
落閒是鋪排體面

石

宗子維城固將軍飲羽威巖花鑑裏發雲葉錦中飛入
宋星初隕過湘鷺早歸倘因持補極寧復羨支機

三四有巧思
而乏生韻

道

銅駝分鞏洛劍閣抵臨邛紫微三千里青樓十二重玉
關塵似雪金穴馬如龍今日中衢上堯躔更可逢

琵琶

朱絲聞岱谷鑠質本多端半月分弦出叢花拂面安將
軍曾制曲司馬屢陪觀本是胡中樂希君馬上彈

鐘

既接南鄰磬還隨北里笙平陵通曙響長樂警宵聲秋
至含霜動春歸應律鳴豈惟常待扣金篴有餘清

笛

羌笛寫龍聲長吟入夜清關山孤月下來向隴頭鳴
逐吹梅花落含春柳色驚行觀向子賦坐憶舊鄰情

桂

未植蟾宮裏寧移玉殿幽枝生無限月花滿自然秋
俠客條為馬仙人葉作舟願君期道術攀折可淹留

三四意絕佳
第語格稍晚

附賦 布義孫卿子登高楚屈平銅臺初下筆樂觀
正飛纓乍有凌雲勢時聞擲地聲造端長體物無復

大夫名

附金 南楚標前貢西秦識舊城祭天封漢嶺擲地

警猿聲向日披沙淨含風振鐸鳴方同楊伯起獨有

四知名

附兔 上蔡應初擊平岡遠不稀日隨槐葉長形逐

桂條飛漢月澄秋色梁園映雪輝唯當感純孝郭郭

引兵威 詠物病其最切以其死而無味也

詩惟其似而已此言可以補類書之不及

武三思挽歌

玉匣金為縷銀鈎石作銘短歌傷薤曲長暮泣松扃事

往昏朝霧人亡折夜星忠賢良可惜圖畫入丹青

五六語
不泛泛

金八八八
卷四
天官崔侍郎夫人盧氏挽歌

寵服當年盛芳魂此地窮
劍飛龍匣在人去鵲巢空
簾愴孤生竹琴哀半死桐
唯當青史上千載仰媚風

五言排律

奉和幸韋嗣立山莊侍宴應制

南洛師臣契東巖王佐居
幽情遺紱冕宸眷屬樵漁
制下峒山蹕恩迴灞水興
松門駐旌蓋薜幄引簪裾
石磴平黃陸煙樓半紫虛
雲霞山路近琴酒俗情疎
喬木千

齡外懸泉百丈餘，崖深經煉藥穴古，舊藏書樹宿搏風。
烏池遊縱壑，魚寧知天子貴尚憶武侯廬。

筆意
疎

附李義府和茅屋承三
顧桃源接九重語佳

餞薛大夫護邊

荒隅時未通，副相下臨戎。授律星芒動，分兵月暈空。
犀皮擁青索，象齒飾雕弓。決勝三河勇，長驅六郡雄。
登山窺代北，屈指計遼東。佇見燕然上，抽毫頌武功。

王屋山第之側雜構小亭暇日與羣公同遊

桂亭依絕巘蘭榭俯迴谿綺棟魚鱗出雕甍鳳羽栖引
泉聊漲沼鑿磴且通蹊席上山花落簾前野樹低弋林
開曙景釣渚發晴霓狎水驚梁鴈臨風聽楚鷄復看題
柳葉彌喜蔭桐圭

附奉和望春宮露下鷹初擊風高鴈欲賓奉和辛三
會寺竹是蒸青外池仍點墨餘奉和天樞成山類叢
雲起珠疑大火懸聲流
塵作劫業固海成田

七言絕句

送司馬先生

蓬閣桃源兩處分人間海上不相聞一朝琴裏悲黃鶴

何日山頭望白雲

沈佺期

文苑傳云內黃人舉進士長安中累遷通事舍人預修三教珠英善屬文尤長七言之作與宋

之問齊名再轉考功員外坐贓配流嶺表神龍中為修文館直學士後歷中書舍人太子詹事開元初卒

有文集十卷

新唐書云建安後訖江左詩律屢變至沈約庾信以音韻相婉附屬對精密及宋之問沈

佺期尤加靡麗回忌聲病約句準篇如錦繡成文學者宗之號為沈宋語曰蘇李居前沈宋比肩

四傑才氣雖雄情詞未斐蘇李加以密裁沈宋出之綺思自此藻麗日開宮商遞變律詩之盛在此

際間耳 佳期最饒綺思不
作綺語製如純錦品最為佳

五言律詩

九日臨涓亭侍宴應制得長字

御氣幸金方憑高薦羽觴
魏文頌菊蕊漢武賜萸囊
秋變銅池色晴添銀樹光
一作去鶴留笙吹歸鴻識舞行
年年重九慶日

月奉天長

送金城公主適西蕃應制

金罍扶丹掖銀河屬紫閣
那堪將鳳女還以嫁烏孫玉

就歌中怨珠辭掌上恩西戎非我匹明主至公存

任期詩思優柔語最入人深際結語何溫

附李適應制月作臨邊曉花為度嶺春

幸白鹿觀應制

紫鳳真人府斑龍太上家
天流芝蓋下山轉柱旗斜
聖藻垂寒露仙杯落曉霞
惟應問王母桃作幾時花

長門怨

月皎風泠泠長門次掖庭
玉階聞墜葉羅幌見飛螢
清露

疑珠綴流塵下翠屏妾心君未察愁歎劇繁星

此詩不琢而工淺貌深衷優柔悱惻當入建安賦料語最香美

被試出塞

十年通大漠萬里出長平寒日生戈劍陰雲拂旆旌
烏啼舊壘疲馬戀空城辛苦臯蘭北胡塵損漢兵

語足悲涼中四語是長篇短賦

雜詩四首

鐵馬三軍去金閨二月還邊愁離上國春夢失陽關池

水瑠璃淨園花玳瑁斑
歲華空自擲愁怨不勝顏

春夢失陽關一語變局轉入轉深有夢無從愁何
可奈乃知夢可療思片時恍惚猶勝三秋之慨涕

耳五六語

氣芬芳

落葉驚秋婦高砧促暝機
蜘蛛尋月度螢火傍人飛
清鏡紅埃入孤燈綠焰微
怨啼能至曉獨自懶縫衣

妾家臨渭北春夢著遼西
何苦朝鮮郡年年事鼓鼙
燕來紅壁語鶯向綠牕啼
為許長相憶闌干玉筍齊

聞道黃龍戍頻年不解兵
可憐閨裏月長在漢家營
少

婦今春意良人昨夜情誰能將旗鼓一為取龍城

可憐閨裏月長在漢家營恨不與俱誰能將旗鼓
一為取龍城此其結想欲狂矣為者為誰語何殷
喁

剪綵

宮女憐芳樹裁花競早榮寒依刀尺盡春向綺羅生弱
蒂盤絲發香蕤結素成纖枝幸不棄長就玉階傾

三四

恩幸

餞高唐州詢

弱冠相知早中年不見多生涯在王事容鬢各蹉跎良
守初分岳嘉聲即潤河還從漢闕下傾耳聽中和

五六轉入
合拍可愛

遊少林寺

長歌遊寶地徙倚對珠林
鴈塔丹青古龍池歲月深
紺園澄夕霽碧殿下秋陰
歸路煙霞晚山蟬處處吟

五六語
致修潔

早發平昌島

解纜春風後鳴榔曉漲前陽鳥出海樹雲鴈下江煙積
氣衝長島浮光溢大川不能懷魏闕心賞獨泠然

中聯語
氣高朗

章懷太子靖妃挽詞

彤史佳聲載青宮懿範留形將鸞鏡隱魂伴鳳笙遊送
馬嘶殘日新螢落晚秋不知蒿里曙空見隴雲愁

圓轉
如丸

七言律詩

龍池篇

龍池躍龍龍已飛龍德先天天不違池開天漢分黃道
龍向天門入紫微邸第樓臺多氣色君王鳧鴈有光輝
為報寰中百川水來朝此地莫東歸

前四語法度恣縱後四語興致淋漓
此與古意二首當是唐人律詩第一

古意呈補闕喬知之

盧家少婦鬱金堂

一作香

海燕雙棲玳瑁梁九月寒砧催

木葉十年征戍憶遼陽白狼河北音書斷丹鳳城南秋

夜長誰為含愁獨不見更教明月照流黃

高古渾厚絕不似唐人所為
三四迴出常度結更雄厚深沈

奉和立春遊苑迎春

東郊暫轉迎春仗上苑初飛行慶杯風射蛟冰千片斷
氣衝魚鑰九闕開林中覓草纔生蕙殿裏爭花併是梅
歌吹銜恩歸路晚棲烏半下鳳城來

三四是生獲語
猶勝於熟套

奉和春初幸太平公主南莊應制

主家山第早春歸御輦春遊繞翠微
買地鋪金曾作埒
尋河取石舊支機
雲間樹色千花滿
竹裏泉聲百道飛
自有神仙鳴鳳曲
併將歌舞報恩暉

五六語
帶風味

奉和春日幸望春宮應制

芳郊綠野散春晴
複道離宮煙霧生
楊柳千條花欲綻
蒲萄百丈蔓初縈
林香酒氣元相入
鳥嘯歌聲各自成
定是風光牽宿醉
來晨復得幸昆明

侍宴安樂公主新宅應制

皇家貴主好神仙，別業初開雲漢邊。
山出畫如鳴鳳嶺，池成不讓飲龍川。
妝樓翠幌教春住，舞閣金鋪借日懸。
敬從乘興來此地，稱觴獻壽樂鈞天。

三四語饒興味五六虛活如李嶠還將石溜調琴曲更取霞峯入酒杯則死煞矣

興慶池侍宴應制

碧水澄潭映遠空，紫雲香駕御微風。
漢家城闕疑天上，秦地山河似鏡中。
向浦迴舟萍已綠，分林蔽殿槿初紅。

古來徒羨橫汾賞今日宸遊聖藻雄

三四意

象絕佳

再入道場紀事應制

南方歸去再生天內殿今年異昔年見闢乾坤新定位
看題日月更高懸行隨香輦登仙路坐近鑪煙講法筵
自喜恩深陪侍從兩朝長在聖人前

三四虛形語却實在

相後人更甚費力

和上已連寒食有懷京洛

天津御柳碧遙遙軒騎相從半下朝行樂光輝寒食借
太平歌舞晚春饒紅妝樓下東迴輦青草洲邊南渡橋
坐見司空掃西第看君侍從落花朝

五言排律

白蓮花亭侍宴應制

九日陪天仗三秋幸禁林霜威變綠樹雲氣落青岑水
殿黃花合山亭絳葉深朱旗夾小徑寶馬駐清潯苑吏
收寒果饗人膳野禽承歡不覺暝遙響素秋砧

霜威變綠樹着力下語
雲氣落青岑景語適然

仙夢池亭侍宴應制

步輦尋丹嶂行宮在翠微川長看鳥滅谷轉聽猿稀天
磴扶階迴雲泉透戶飛閒花開石竹幽葉吐薔薇徑狹
難留騎亭寒欲進衣白龜來獻壽仙吹返彤闈

谷轉聽猿稀得景

閒花二語有韻

奉和晦日駕幸昆明池應制

法駕乘春轉神池象漢迴雙星遺舊石孤月隱殘灰戰

鷓逢時去恩魚望幸來岸花緹騎遠堤柳幔城開思逸
橫汾唱歡流宴鎬杯微臣彫朽質羞覩豫章材

雙星二語當家句復陡健岸花二語布景裝句俱
佳 昆明池侍宴靈魚銜寶躍仙女廢機迎亦佳

奉和聖制幸禮部尚書竇希玠宅

北闕垂旒暇南宮聽禮迴天臨翔鳳轉恩向躍龍開蘭
氣薰仙帳榴花引御杯水從金穴吐雲是玉衣來池影
搖歌席林香散舞臺不知行漏晚清蹕尚徘徊

水從二語景色最
佳下句入想更勝

酬蘇員外味道夏晚寓直省中見贈

並命登仙閣分曹直禮闈大官供宿膳侍史護朝衣卷
幔天河入開牕月露微小池殘暑退高樹晚涼歸冠劍
無時釋軒車待漏飛明朝題漢柱三署有光輝

三四典雅小
池二語鬆秀

和韋舍人早朝

閭闔連雲起巖廊拂霧開玉珂龍影度珠履鴈行來長
樂宵鐘盡明光曉奏催一經傳舊德五字擢英才儼若

神仙去紛從霄漢迴千春奉休歷分禁喜趨陪

三四冠冕一
經二語典貴

自考功員外授給事中

南省推丹地東曹拜瑣闥惠移雙管筆恩降五時衣出
入宜真選遭逢每濫飛器慙公理拙才謝子雲微案牘
遺常禮朋僚隔等威上台行揖讓中禁動光輝旭日千
門起初春八舍歸贈蘭聞宿昔談樹隱芳菲何幸鹽梅
處惟憂對問機省躬知任重寧止冒榮非

語語矜貴

氣道

和元舍人萬頃臨池翫月戲為新體

春風搖碧樹秋霧卷丹臺復有相宜夕池清月正開玉
流含吹動金魄度雲來熠燿光如沸翩翩景若摧半環
投積草碎壁聚流杯夜半平無煥天晴皎未墮鏡將池
作匣珠以岸為胎有美司言暇高興獨悠哉揮翰初難
擬飛名豈易陪夜光珠在握了了見沈灰

麗語
瑰
燦燭人

登瀛洲南樓寄遠

層城起麗譙憑覽出重霄茲地多形勝中天宛寂寥四
榮摩鶴鶴百拱厲風颭北際燕王館東連秦帝橋晴光
七郡滿春色兩河遙傲睨非吾土躊躇適遠囂離居欲
有贈春草寄長謠

塞北

虜障天驕起秦城地脉分柏壇飛五將梅吹動三軍鋒
刀奔濤色旌旗燭火文朔風吹汗漫飄灑灑輅輶海氣

如秋雨邊烽似夏雲二庭無歲月百戰有功勳形影隨
魚貫音書在鴈羣歸來拜天子凱樂助南薰

釣竿篇

朝日斂紅煙垂竿向綠川人疑天上坐魚似鏡中懸避
檝時驚透猜鈎每誤牽湍危不理轄潭靜欲留船釣玉
君徒尚徵金我未賢為看芳餌下貪得會無筌

三四景趣佳絕潭靜欲留船川情人意兩美樂安
公主山池梅花寒待雪桂樹晚留煙此留亦佳

夏日都門送司馬員外逸客孫員外佺北征

時相

王為元帥魏大
夫元忠為副

二庭追虜騎六月動周師廟畧天人授軍麾相國持復
言徵二妙才命重當時畫省連征索橫門共別詞雲迎
出塞馬風卷度河旗計日方夷寇旋聞杖杜詩

哭道士劉無得

聞有玄都客成仙不易祈蓬萊向清淺桃杏欲芳非縮
地黃泉出昇天白日飛少微星夜落高掌露朝晞吐甲
龍應出銜符鳥自飛國人思負局天子惜被衣花月留

丹洞琴笙下翠微
嗟來子桑扈爾獨返於幾

因人二

語的當

李又

本傳云趙州人舉進士景龍中累遷中書舍人景雲初遷吏部侍郎尋轉黃門侍郎開元初為紫微

侍郎俄拜刑部尚書卒又本名尚真少與兄尚一尚貞俱以文章見稱後兄弟同為一集號曰李氏花萼集
紀事云與蘇頲對掌綸詔明皇曰前有味道嶠朕今有頲又皆號蘇李

五言排律

奉和幸三會寺應制

睿德總無邊
神皋擇勝緣
二儀齊法駕
三會禮香筵
漢

闕中黃近秦山太白連臺疑書鳥日池似刻鯨年滿月
臨真境秋風入御絃小臣叨下列持管謬窺天

唐詩鏡卷四

欽定四庫全書

唐詩鏡卷五

明 陸時雍 編

初唐第五

宋之問

文苑傳云字延清弘農人弱冠知名善五言詩時無出其右者累遷尚方監丞預修三教珠英

坐附張易之左遷瀧州參軍景龍中再轉考功員外郎遷為弘文館學士尋轉越州長史睿宗立流欽州先天中賜死武平一為之纂集十卷

七言古詩

至端州驛見杜五審言沈三佺期閻五朝隱王
二無競題壁慨然成詠

逐臣北地承嚴譴謂到南中每相見豈意南中岐路多
千山萬水分鄉縣雲搖雨散各翻飛海濶天長音信稀
處處山川同瘴癘自憐能得幾人歸

五言律詩

春日芙蓉園侍宴應制

芙蓉秦地沼盧橘漢家園谷轉斜盤徑川迴曲抱原風

來花自舞春入鳥能言侍宴瑤池夕歸途騎吹繁

第六

佳句

夏日仙夢亭應制

高嶺逼星河乘輿此日過野舍時雨潤山雜夏雲多
睿藻光巖穴宸襟洽薜蘿悠然小天下歸路滿笙歌

山出雲橫峰嵐雜沓
第四語最饒景趣

奉和九日幸臨渭亭登高應制

得歡字

令節三秋晚重陽九日歡仙杯還泛菊寶饌且調蘭御

氣雲霄近乘高宇宙寬今朝萬壽引宜向曲中彈

五六境
界自成

奉和聖製閏九月九日登莊嚴總持二寺閣

閏月再重陽仙輿歷寶坊帝歌雲稍白御酒菊猶黃風
鐸喧行漏天花拂舞行豫遊多景福梵宇日生光

三四用事佳不惟菊酒切當即歌雲
在此相宜若移之他時便不韻矣

麟趾殿侍宴應制

北闕層城峻西宮複道懸乘輿歷萬戶置酒望三川花

柳含丹日山河入綺筵欲知陪賞處空外有飛煙

上陽宮侍宴應制

得林字

廣樂張前殿重表感聖心
砌奠霜月盡庭樹雪雲深
舊
渥駮宸御慈恩忝翰林
微臣一何幸再得聽瑤琴

扈從登封途中作

帳殿鬱崔嵬仙遊實壯哉
曉雲連幕捲夜火雜星回
谷
暗千旗出山鳴萬乘來
扈從良可賦終乏按天材

體面

規模

松山嶺

翼翼高旌轉鏘鏘鳳輦飛塵銷清蹕路雲濕從臣衣白
羽搖丹壑天營逼翠微芳聲耀今古四海警宸威

濕字最
有景色

登禪定寺閣

梵宇出三天登臨望八川開襟坐霄漢揮手拂雲煙函
谷青山外昆明落日邊東京楊柳陌少別已經年

三四體

態自在

陸渾山莊

歸來物外情，負杖閱巖耕。
源水看花入，幽林採藥行。
野人相問姓，山鳥自呼名。
去去獨吾樂，無能愧此生。

五六最
饒意趣

送永昌蕭贊府

柳變曲江頭，送君函谷遊。
弄琴寬別意，酌醴醉春愁。
戀本亦何極，贈言微所求。
莫令金谷水，不入故園流。

三四好意來得氣潤五六
轉接頂上自覺局寬脉脈

送杜審言

卧病人事絕聞君萬里行
河橋不相送江樹遠含情
別路追孫楚維舟弔屈平
可惜龍泉劍流落在豐城

三四簡鍊精深有意不盡言之妙

漢江宴別

漢廣不分天舟移杳若仙
秋虹映晚日江鶴弄晴煙
積水浮冠蓋遙風逐管絃
嬉遊不可極留恨此山川

過蠻洞

越嶺千重合巒谿十里斜竹迷樵子徑萍匝釣人家林
暗交楓葉園香覆橘花誰憐在荒外孤賞足雲霞

三四

景具

經梧州

南國無霜霰連年見物華青林暗換葉紅蕊續開花春
去聞山鳥秋來見海槎流芳雖可悅會自泣長沙

三四寫

如語次

泛鏡湖南谿

金匱山志卷五
乘興入幽棲舟行日向低巖花候冬發谷鳥作春啼
嶂開天小叢篁夾路迷猶聞可憐處更在若邪谿

中二聯可
記可畫

遊韶州廣界寺

影殿臨丹壑香臺隱翠霞巢飛含象鳥砌蹋雨空花
寶鐸搖初霽金池映晚沙莫愁歸路遠門外有三車

附江亭晚望望水知茶性看山欲斷魂秋
晚遊普耀寺山形無隱霽野色遍呈秋

七言律詩

嵩山石淙侍讌應制

得幽字

離宮秘苑勝瀛洲，別有仙人洞壑幽。
巖邊樹色含風冷，石上泉聲帶雨秋。
鳥向歌筵來度曲，雲依帳殿結為樓。
微臣昔忝方明御，今日還陪八駿遊。

石上句冷然清越之趣時在人耳

五言排律

奉和晦日幸昆明池應制

春豫靈池會滄波，帳殿開舟凌石鯨。
度槎拂斗牛迴節

金少也月三言
卷五
晦莫全落春遲柳暗催象溟看浴景燒劫辨沈灰鎬飲

周文樂汾歌漢武才不愁明月盡自有夜珠來

紀事云中宗正

月晦日幸昆明池賦詩羣臣應制百餘篇帳殿前結綵樓命上官昭容選一首為新翻御製曲從臣悉集其下須臾紙落如飛唯沈宋二詩不下又移時一紙飛墜乃沈詩也及聞其評曰二詩工力悉敵沈詩落句云微臣彫朽質羞覩豫章材蓋詞氣已竭宋詩云不愁明月盡自有夜珠來猶陡健騫舉沈乃伏不敢復爭

三四語氣響湛象溟二語擅場不及沈佺期雙呈二語色象尤勝

奉和幸神皋亭應制

清蹕喧黃道乘輿降紫宸霜戈凝曉日雲管發陽春臺

古今疑漢林餘半識秦宴酣詩布澤節改令行仁昔恃
山河險今依道德淳多慚獻嘉頌空累屬車塵

語語選

意而出

奉和幸韋嗣立山莊侍宴應制

樞掖調梅暇林園藝槿初入朝榮劍履退食偶琴書地
隱東巖室天迴北斗車旌門臨窸窣輦道屬扶疎雲罕
明丹壑霜茄徹紫虛水疑投石處谿似釣璜餘帝澤頒
卮酒人歡頌里閭一承黃竹詠長奉白茅居

是時諸作宋為獨勝端凝詳雅奉和得此
最佳水疑二語能使人增重故自當家

扈從登封告成頌應制

御路迴中嶽天營接下都百靈無後至萬國競前驅
文
衛巖清蹕幽仙讀寶符貝花明漢果芝草入堯廚
濟濟
衣冠會喧喧夷夏俱宗裡仰神理刊木望川途
撫已貧
非病時來本不愚願陪丹鳳輦率舞白雲衢

敷布
平滿

宴安樂公主宅

得空
字

英藩築外館愛主出王宮賓至星槎落仙來月宇空玳
梁翻賀燕金埒倚晴虹簫去秦臺裏書開魯壁中短歌
能駐日艷舞欲嬌風聞有淹留處山阿滿桂叢

三四豪勝金埒倚
晴虹語有氣象

和姚給事寓直之作

清論滿朝陽高才拜夕郎還從避馬路來接珥貂行寵
就黃扉日威回白簡霜柏臺遷烏茂蘭署得人芳禁靜
鐘初徹更疎漏漸長曉河低武庫流火度文昌寓直光

輝重乘秋藻翰揚
暗投空欲報
下調不成章

語語湊拍筋力相當幾為簡鍊而就
初唐排律
嚴緊精工意有餘不陳材有餘不用起伏轉合箱
如入筍後杜子美加以冗長遂
令意語堆垛氣勢少流貫矣

使過襄陽登鳳林寺閣

香閣臨清漢
丹梯隱翠微
林篁天際密
人世谷中違
苔石銜仙洞
蓮舟泊釣磯
山雲浮棟起
江雨入庭飛
信美雖南國
嚴程限北歸
幽尋不可再
留步惜芳菲

宋公宅送甯諫議

宋公爰創宅庾氏更誅茅間出人三秀平臨楚四郊漢
臣來絳節荆牧動金鏡樽溢宜城酒笙裁曲沃匏露荷
新變節風柳夕鳴梢一散陽臺雨方隨越鳥巢

送合宮蘇明府題

鉉府誕英規公才天下知謂垂羔鴈族繼入鳳凰池赤
縣求人隱青門起路歧程迴車少別晷化鳥遙馳神哭
周南境童歌渭北垂賢哉荀奉倩袞職佇來儀

轉接意致
微密緊拍

送楊六望赴金水

借問梁山道，嶽岑幾萬重。
遙州刀作路，絕壁劍為峰。
惜別路窮此，留歡意不從。
憂來生白髮，時晚愛青松。
勿以西南遠，夷歌寢盛容。
台階有高位，寧復久臨邛。

時晚愛青松
意韵兩佳

下桂江龍目灘

停午出灘險，輕舟容易前。
峰攢入雲樹，崖噴落江泉。
巨石潛山怪，深篁隱洞仙。
鳥遊谿寂寂，猿嘯嶺娟娟。
揮袂

日凡幾我行途已千曠投蒼梧郡愁枕白雲眠

鳥遊二語意象幽遠
是處可意而不可言

登粵王臺

江上粵王臺登高望幾回南溟天外合北戶日邊開地
濕煙常起山晴雨半來冬花採盧橘夏果摘楊梅跡類
虞翻枉人非賈誼才歸心不可見白髮重相催

對仗極整亦
復語語擔當

早發始興江口至虛氏村作

候曉踰閩嶠乘春望越臺宿雲鵬際落殘月蚌中開
蒨搖青氣枕柳翳碧苔桂香多露裊石響細泉回抱葉
玄猿嘯銜花翡翠來南中雖可悅北思日悠哉鬢髮俄
成素丹心已作灰何當首歸路行剪故園萊

宿雲鵬際落是適然實景殘月蚌中開
此月何月銖兩不稱便不能作對矣

發藤州

朝夕苦過征孤鴻長自驚泛舟依鴈渚投館聽猿鳴石
髮緣谿蔓林衣掃地輕雲峰刻不似苔蘚畫難成露裊

千花氣泉和萬籟聲攀幽紅處歌躋險綠中行戀切芝
蘭砌悲纏松柏瑩丹心江北使白髮嶺南生魑魅天邊
國窮愁海上城勞歌意無限今日為誰明

石髮二語有微韻以所取名象亦佳謝靈運揚
帆采石華掛席拾海月石華海月語自有韻在

遊雲門寺

維舟探靜域作禮事尊經投跡一蕭散為心自杳冥龕
依大禹穴樓倚少微星沓嶂圍蘭若迴谿抱竹庭覺花
塗砌白甘露洗山青鴈塔騫金地虹橋轉翠屏人天宵

現景神鬼畫潛形理勝常虛寂緣空自感靈入禪從鷓
繞說法有龍聽劫累終期滅塵躬且未寧搖搖不安寐
待月詠巖扃

覺花二語景色俱勝謁禹廟氣青
連海曙雲白洗春湖此語更勝

早入清遠峽

傳聞峽山好旭日掉前沂雨色搖丹嶂泉聲聒翠微兩
岩天作帶萬壑樹披衣秋橘迎寒序春藤礙日輝翳潭
花似織綠嶺竹成圍寂歷環沙浦葱籠轉石圻露餘江

未熟風落瘴初稀
猿飲排虛上禽驚
掠水飛榜童夷唱
合樵女越吟歸
良候斯為美邊愁
自有違誰言望鄉
國
流涕失芳菲

寫色
清洗

發端州初入西江

問我將何去清晨
泝越谿翠微懸宿
雨丹壑飲晴霓樹
影捎雲密藤陰覆
水低潮回出浦駛
洲轉望鄉迷人意
長懷北江行日向
西破顏看鵲喜拭
淚聽猿啼骨肉初

分愛親朋忽解攜路遙魂欲斷身辱理能齊疇日三山
意于茲萬緒睽金陵有仙館即事尋丹梯

三四韻勝身辱理能齊意氣飽決此又
歷艱虞定後得力語之問何以有此

附遊稱心寺寶葉交
香雨金沙吐細泉

五言絕句

渡漢江

嶺外音書斷經冬復立春近鄉情更怯不敢問來人

實歷

語

七言絕句

送司馬道士遊天台

羽客笙歌此地違
離筵數處白雲飛
蓬萊闕下長相憶
桐柏山頭去不歸

唐詩鏡卷五

欽定四庫全書

唐詩鏡卷六

明 陸時雍 編

初唐第六

崔湜

字澄瀾定州人少以文辭知名舉進士累轉左補闕預修三教珠英神龍初轉考功員外附武三思

遷兵部侍郎又附託上官昭容轉中書侍郎平章事

典選失序為李商隱所劾左遷江州司馬授襄陽刺

史韋庶人臨朝復為中書侍郎同門下三品先天中

拜中書令蕭至忠誅湜流嶺外後知湜本謀賜死荆

州

悄悄清音讀
之竦然自異

五言律詩

幸梨園亭觀打毬應制

年光陌上發香輦禁中遊草綠鴛鴦殿花明翡翠樓寶
杯承露酌仙管雜風流今日陪歡豫皇恩不可酬

氣色青
翠可愛

婕妤怨

不分君恩斷新妝視鏡中容華尚春日嬌愛已秋風枕

席臨窓曉屏幃向月空
年年後庭樹榮落在深宮

酬杜麟臺春思

春還上林苑花滿洛陽城
鴛衾夜凝思龍鏡曉含情
憶夢殘燈落離魂暗馬驚
可憐朝與暮樓上獨盈盈

紀事云混

執政時年三十八嘗暮出端門下天津馬上賦詩云春還上林苑花滿洛陽城張說見之歎曰文與位固可致其年不可及也

五六新穎是少年得意之句

唐都尉山池

山渚颺輕舟前谿釣晚流鴈翻蒲葉起魚撥荇花游金
子懸湘袖珠房拆海榴幽尋惜未已清月半西樓

鮮
綻

江樓夕望

試陟江樓望悠悠去國情楚山霞外斷漢水中平公
子留遺邑夫人有舊城蒼蒼煙霧裏何處是咸京

秦州薛都督挽詞

十里絳山幽千年汾水流碑傳門客建劔是故人留隴

樹煙含夕山門月照秋古來鐘鼎盛共畫一萬丘

三四種情極
切不作泛常

附奉和春日幸望春宮
澹蕩春光滿曉空道遙御
輦入離宮山河眺望雲天外臺榭參差煙霧中庭際
花飛錦繡合枝間鳥嘯管絃同即
此歡娛齊鎬宴唯應率舞樂薰風

鄭愔

字文靖滄州人年十七進士擢第來俊臣羅織文
狀皆愔草定張易之兄弟薦為殿中侍御史易之
敗貶宣州司戶既而附武三思謀陷五王
累遷吏部侍郎後與王重福構逆被戮

五言律詩

秋閨

欽定四庫全書

唐詩鈔

三

征客向輪臺幽閨寂不開音書秋鴈斷機杼夜蛩催虛
幌風吹葉閒階露濕苔自憐愁思影常共月徘徊

言之
點點

七言律詩

奉和春日幸望春宮

晨蹕凌高轉翠旌春樓望遠背朱城忽排花上遊天苑
却坐雲邊看帝京百草香心初冒蝶千林嫩葉始藏鶯
幸同葵藿傾陽早願比盤根應候榮

三四步驟迴合

景色粲然在目

附人日重宴大明宮恩賜綵縷人勝應制 瓊殿含
光映早輪玉鸞嚴蹕望初晨池開凍水仙宮麗樹發
寒花禁苑新佳氣徘徊籠細網殘雲浙漚染輕塵良
時荷澤皆迎勝窮谷晞陽猶未春 語亦清峙五六
意境苦弱又李又應制項黠千年執象袞區秦七日
為人慶賞隆七日為人四字最佳造化皇恩從茲伊
始

五言排律

奉和幸三會寺應制

寺傳蒼頡
造書臺

烏籀遺新閣龍旂訪古臺造書臣頡往觀跡帝義來睿

覽山川匝宸心宇宙該梵音隨駐輦天步接乘杯舊苑
經寒露殘池問劫灰散花將捧日俱喜聖慈開

意象

密匝

塞外

塞外蕭條望征人此路賒邊聲亂朔馬秋色引胡笳遙
嶂侵歸日長城帶晚霞斷蓬飛古戍連鴈聚寒沙海岸
雲無葉山春雪作花丈夫期報主萬里獨辭家

哭郎著作

詩禮康成學文章賈誼才已年人得夢庚日鳥為災書
草藏天閣琴聲入夜臺荒階羅駁蘚虛座網浮埃白馬
賓徒散青烏隴隧開空憐門下客懷舊幾遲迴

三四是驚心語
實寫正自有味

郭元振

本傳云名振字元振魏州人舉進士授通泉尉
累遷涼州都督拓州境一千五百開置屯田盡

水陸之利在涼五年夷夏畏慕睿宗即位徵拜吏兵
二部尚書同中書門下三品以功封代國公玄宗講
武驪山生于蠹下流新
州道病卒有集二十卷

五言律詩

塞上

塞外虜塵飛頻年出武威死生隨玉劔辛苦向金微久

戍人將老長征馬不肥仍聞酒泉郡已合數重圍

久戍人偏

老長征馬不肥元振警句也元振嘗山居夜有人面如盤出燈下元振以此詩題其頰遂減明日山行見巨木上有白耳此句在馬見酉陽雜俎

語語

清壯

五言絕句

春江曲

江水春沈沈，沈上有雙竹林。竹葉壞水色，郎亦壞人心。

有古意而
無古韻

王昭君

厭踐冰霜域，嗟為邊塞人。思從漠南獵，一見漢家塵。

好
意

子夜四時歌

春歌

陌頭楊柳枝，已被春風吹。妾心正斷絕，君懷那得知。

秋歌

邀歡空佇立望美頻迴顧何時復採菱江中容相遇

冬歌

北極嚴氣昇南至溫風謝調絲競短歌拂枕憐長夜

馬懷素

本傳云字惟臣潤州人寓居江都師事李善博覽經史善屬文舉進士長安中為監察御史守

法不阿李迴秀恃勢納賄懷素劾罷之累拜中書舍人開元初為戶部侍郎封常山縣公三遷秘書監無昭文館學士深為玄宗所禮卒謚曰文

七言律詩

奉和立春遊苑迎春應制

玄籥飛灰出洞房青郊迎氣肇初陽仙輿暫下宜春苑
御醴行開薦壽觴映水輕苔猶隱綠綠堤弱柳未舒黃
唯有裁花飾簪鬢恒隨聖藻狎年光

武平一

平一名甄以字行博學通春秋工文辭武后時
畏禍隱嵩山修浮屠法屢詔不應中宗立迫召

為修文館學士雖宴豫嘗因詩頌規戒玄宗立貶
蘇州參軍徙金壇令既謫名亦不哀開元中卒

七言律詩

奉和立春內出綵花樹應制

鑾輅青旂下帝臺東郊上苑望春來黃鶯未解林間囀
紅蕖先從殿裏開畫閣條風初變柳銀塘曲水半含苔

欣逢睿藻光韶律更促霞觴畏景催

紀事云是日中宗手批云平一年雖

最少文甚警新悅紅蕖之先開訝黃鸝之未囀循環吟咀賞歎兼懷今更賜花一枝以彰其美所賜學士花並令插在頭上後所賜者平一左右交插

三四氣

松不老

宗楚容

字叔教河東人則天從父姊之子累官夏官侍郎神龍中武三思用事引為兵部尚書同知政

事俄遷中書令與紀處訥共為朋黨時人呼為宗紀韋氏敗伏誅見蕭至忠傳

五言律詩

正月晦日侍宴滄水應制賦得長字

御輦出明光
乘流泛羽觴
珠胎隨月減
玉漏與年長
寒盡梅猶白
風遲柳未黃
日斜旌騎轉
休氣滿林塘

劉憲

文苑傳云字元度宋州寧陵人舉進士累除冬官員外天授中推按來俊臣嫉其暴酷欲因事繩之

反為所構俊臣伏誅為鳳閣舍人神龍初坐為張易之所引自吏部侍郎出刺渝州景雲初三為太子詹事有集三十卷

五言律詩

折楊柳

沙塞三河道金閨二月春碧煙楊柳色紅粉綺羅人露
葉憐啼臉風花思舞巾攀持君不見為聽曲中新

三四
偷格

徐彥伯

本傳云名洪以字行兗州人少以文章擅名對
策擢第累轉蒲州司兵參軍時司戶韋暹善判

事司士李亘工於筆札彥伯文辭雅美時謂河東三
絕神龍中預修武后寶錄封高平縣子景雲中遷散
騎常侍太子賓客昭文館學士卒有文集二十卷
紀事云彥伯為文多變易求新以鳳閣為鸚閣龍門
為虬戶金谷為銑窟玉山為瓊岳竹馬為
蓀驂月兔為魄兔後進教之謂之徐溫體

五言排律

侍宴韋嗣立山莊應制

鼎臣休澣隙方外結遙心別業青霞境孤潭碧樹林每
馳東野策遙弄北谿琴帝春行時豫台園賞歲陰移鑾
明月沼張組白雲岑御酒瑤觴落仙壇竹徑深三光懸
聖藻五等冠朝簪自昔皇恩感咸言獨自今

韋元旦

京兆萬年人擢進士補東阿尉遷左臺御史與
張易之通姻屬易之敗貶感義尉後復進用

為主客員外郎
遷中書舍人

七言律詩

興慶池侍宴應制

滄池潏沆帝城邊，殊勝昆明鑿漢年。
夾岼旌旗疏輦道，中流簫鼓振樓船。
雲峰四起迎宸幄，水樹千重入御筵。
宴樂已深魚藻詠，承恩更欲奏甘泉。

語無
粧綴

唐詩鏡卷六

欽定四庫全書

唐詩鏡卷七

明 陸時雍 編

初唐第七

張說

本傳云字道濟洛陽人弱冠應詔舉累轉右補闕預修三教珠英擢鳳閣舍人忤旨流欽州中宗即

位召拜兵部員外郎累拜兵部侍郎弘文館學士景雲中遷中書侍郎知政事進中書令封燕國公為姚崇所構出刺相州坐事左轉岳州開元中拜兵部尚書仍知政事又敕為朔方軍節度大使往巡五城後為集賢院學士尚書左丞相卒謚文貞說為文屬思精壯謫岳州後詩益悽惋謂得江山助云

五言古詩

再使蜀道

眇眇葭萌道蒼蒼
襄斜谷煙壑爭晦
深雲山共重複古
來風塵子同眩望
鄉日芸閣有儒生
輶車倦馳逐青春
客岷嶺白露搖江
服歲月鎮羈孤山
川俄反覆魚游戀
深水鳥遷戀喬木
如何別親愛坐去
文章國蟋蟀鳴戶
庭蠨蛸網琴筑

起結稍

有古色

石門墨山二山相連有禪堂觀天下絕境

困輪江上山近在華容縣常涉巴丘首天晴遙可見佳
遊屢前諾芳月愆幽眷及此符守移歡言臨道便既攜
賞心客復有送行掾竹徑入陰窅松崖上空藉草共林
一色雲與峯萬變探窺石門斷緣越沙澗轉兩山勢爭
雄峯嶽相顧眇藥妙靈仙寶鏡華巖竅選清都西澗絕
金地東敞宴池果接園畦風煙通臺殿高尋去石頂曠
覽天宇遍千山紛滿目百川豁對面騎來雲氣迎人去

鳥聲總長揖桃源士舉世同企羨

語氣多分草共林一色雲與峯萬變的是唐語境
華巖壑選一語最佳第華字不老騎來雲氣迎絕
未見佳人去鳥
聲總庶有餘趣

七言古詩

遙同蔡起居偃松篇

清都衆木總榮紛傳道孤松最出羣名接天庭長景色
氣連宮闕借氛氲懸池滴滴停華露偃蓋重重拂瑞雲
不惜流膏助仙鼎願將楨榦奉明君莫比冥靈楚南樹

朽老江邊代不聞

清而未老去後
二語作律為安

五言律詩

恩制賜食於麗正殿書院宴賦得林字

東壁圖書府西垣翰墨林
誦詩聞國政講易見天心
位竊和羹重恩叨醉酒深
緩歌春興曲情竭為知音

渾厚稱題
結意非體

盧已驛聞張御史張判官欲到不得待留贈之

金分四庫全書
卷七
旅竄南方遠傳聞北使來舊庭知玉樹合浦識珠胎白
髮因愁變丹心託夢迴皇恩若再造為憶不然灰

深渡驛

旅宿青山夜荒庭白露秋洞房懸月影高枕聽江流猿
響寒巖樹螢飛古驛樓他鄉對搖落併覺起離憂

三四語氣清高
非追琢可擬

還至端州驛前與高六別處

舊館分江口悽然望落暉相逢傳旅食臨別換征衣昔

記山川是今傷人代非往來皆此路生死不同歸

三四纏綿悽然五六老氣結更可傷
凡人到真處閒言巧語自不暇及

和尹懋秋夜遊澧湖

澧湖佳可遊既近復能幽林裏栖精舍山間轉去舟
飛江月冷猿嘯野風秋不是迷鄉客尋竒處處留

第四句

得景

七言律詩

奉和聖製春日幸望春宮應制

別館芳菲上苑東，飛花澹淡御筵紅。
城臨渭水天河靜，闕對南山雨露通。
繞殿流鶯凡幾樹，當蹊亂蝶許多叢。
春園既醉心和樂，共識皇恩造化同。

三四

濃郁

五言排律

奉和聖製途中經華岳應制

西嶽鎮皇京，中峯入太清。
玉鑿重嶺應緹綺，薄雲迎霧日懸高。
掌寒空映削，成軒遊會神處。
漢幸望仙情，舊廟

青林古新碑綠字生羣臣願封岱還駕勒鴻名

清映
如洗

奉和聖製送王峻巡邊應制

六月歌周雅三邊遣夏卿欲施攻戰法先作簡稽行禮
樂知謀帥春秋識用兵一勞堪定國萬里即長城策有
和戎利威傳破虜名軍前雨灑道樓上月臨營別藻瑤
華降同衣錦褱榮關山由義近戎馬為恩輕絲竹路傍
散風雲馬上生朝廷謂吉甫邦國望君平

語選而出如李陵步卒五千尊俎雍
容有折衝萬里之勢結意諄復大佳

將赴朔方軍應制

禮樂逢明主韜鈴用老臣
恭憑神武策遠靜鬼方人
供帳榮恩餞山川喜詔巡
天文日月麗朝賦管絃新
幼志傳三畧良材謝六鈞
膽猶忠作屏心故道為隣
漠保河南地胡清塞北塵
連年大軍後不日小康辰
劍舞輕離別歌酣忘苦辛
從來思博望許國不謀身

一起四語得體膽猶二語當屬佳
句漢保河南地以下意欠精陡

同劉給事城南宴集

水竹幽閒地簪纓近侍臣
雍容乘暇日瀟灑出囂塵
樹對忠朋鳥池深入養鱗管
弦高逐吹歌舞妙含春
老子叨專席歡邀隔縉紳
此中情不淺遙寄賞心人

送趙二尚書彥昭北伐

北地河水合邊城備此時
兵連紫塞路將舉白雲司提
劍榮中貴銜珠盛出師
日華光組練風色艷旌旗
投筆尊前起橫戈馬上辭
梅花吹別引楊柳賦新詩

岳州宴姚紹之 并序

姚司馬往在柏臺每歛骨鯁及茲荒服偶得官騃復
有令弟美膚芬芳襲子山寺外廬幽深形勝童冠是

集歡言賦詩

杞梓滯江濱光華向日新
難兄金作友媚子玉為人
山水含秋興池亭借善隣
簷松風送靜院竹鳥來馴
翠管吹黃菊瑤盤鱸紫鱗
緩歌將醉舞為拂繡衣塵

佳麗

之章

遊洞庭湖

平湖曉望分仙嶠，氣氤氳鼓柁乘清渚。
尋峯弄白雲，江寒天一色。日靜水重紋，樹坐參猿嘯。
沙行入鷺羣，綠源斑篠密。崑徑綠蘿紛，洞穴傳虛應。
楓林覺自薰，雙童有靈藥。願取獻明君。

江寒二

語稚

七言絕句

送梁六自洞庭山作

巴陵一望洞庭秋日見孤峯水上浮聞道神仙不可接
心隨湖水共悠悠

後二語托興

無寓別情

蘇題

字廷碩少有俊才一覽千言舉進士累遷監察御史神龍中拜中書舍人父瓌同中書門下三品父

子同掌樞密時以為榮開元中遷紫微侍郎與宗瓌同知政事後知益州大都督府長史事卒諡曰文憲題襲封許國公時稱小許公又與燕國公張說稱望峯同時號燕許松牕錄云中宗嘗召宰相蘇瓌李嶠子進見時皆童年帝謂曰汝等各以所道書取宜奏吾者言之題應曰木從繩則正后從諫則聖嶠子曰斬朝涉之脛剖賢人之心

帝曰蘇瓌有子李嶠無兒

五言律詩

奉和九日幸臨渭亭登高應制

得時字

嘉會宜長日
高筵順動時
曉光雲外洗
晴色雨餘滋
降鶴因韶德
吹花入御詞
願陪陽數節
億萬九秋期

三四

多姿

奉和魏僕射秋日還鄉有懷之作

南宮夙拜罷
東省晝遊初
飲餞傾冠蓋
傳呼問里閭
樹悲懸劍所
谿想釣璜餘
明發輝光至
喧聞駟馬車

邊秋薄暮

海外秋鷹擊霜前
旅鴈歸邊風思鞞鼓
落日慘旌麾
浦暗漁舟入川長
獵騎稀客悲逢薄暮
況乃事戎機

曉發方騫驛

傳置遠山蹊
龍鍾蹴澗泥
片雲時作雨
微照已生霓
鬢髮愁氛換
心情險路迷
方知向蜀老
偏識子規啼

三四寫景
落手輕快

七言律詩

奉和春日幸望春宮應制

東望望春春可憐，更逢晴日柳含煙。
宮中下見南山盡，城上平臨北斗懸。
細草偏承迴輦處，飛花故落舞觴前。
宸遊對此歡無極，烏弄歌聲雜管絃。

三四寫景平淡無奇五六粧造多方無情無色
詩頭意象入手然後布景生情此何容強作

廣達樓下夜侍醮宴應制

東嶽封迴宴洛京，西壩通晚會公卿。
樓臺絕勝宜春苑，燈火還同不夜城。
正覩人間朝市樂，忽聞天上管絃聲。

酺來萬舞羣臣醉喜戴千年聖主明

三四語

屬興味

扈從鄆杜間奉呈刑部尚書舅崔黃門馬常侍
翠輦紅旗出帝京長楊鄆杜昔知名雲山一一看皆好
竹樹蕭蕭畫不成羽騎將過持袂拂香車欲度捲簾行
漢家曾草巡遊賦何似今來應聖明

三四風味清美

五六絕無意致

春晚紫微省直寄內

直省清華接建章向來無事日猶長
花間燕子樓鷓鴣竹下鷓鴣繞鳳凰
內史通宵承紫誥中人落晚愛紅妝
別離不慣無窮憶莫誤卿卿學太常

無他奇氣
覺芳潤

附興慶池侍宴應制 降鶴池前迴步輦
栖鸞樹杪出行宮山光積翠遙疑逼
水態含青近若空直視天河垂象外
俯窺京室畫圖中皇歡未使恩波極
日暮樓船更起風 三四苦摸五六硬寫

五言排律

閒園即事寄韋侍御

結廬東城下直望江南山青靄遠相接白雲來復還拂
筵紅鮮上開幔綠條間物應春偏好情忘趣轉閒憲臣
饒美度睽事惜徂顏有酒空盈酌高車不可攀

曉發興州入陳平路

旌節指巴岷年年行且巡暮來青嶂宿朝去綠江春魚
貫梁緣馬猿奔樹息人邑祠猶是漢谿道即名陳舊史
饒遷謫恒情厭苦辛寧知報恩者天子一忠臣

魚貫二語

是珍玉手

同餞陽將軍兼源州都督御史中丞

右地接龜沙中朝任虎牙然明方改俗去病不為家將
禮登壇盛軍容出塞華朔風搖漢鼓邊馬思胡笳旗合
無邀正冠危有觸邪當看勞還日及此御溝花

三四語

極擔當

趙冬曦

字開定州人推第拜左拾遺神龍初上言古律
條目千餘開元初為監察御史坐事流岳州還

知史館歷官國子祭酒卒冬曦性放達不屑世
事兄弟皆顯官張說云韋趙兄弟人之杞梓

五言律詩

陪燕公遊澠湖上寺

江外多山水招要步馬來琴將天籟合酒共鳥歌催巖
坐攀紅藥谿行愛綠苔所懷非此地遊望亦裴徊

語氣
清明

劉幽求

本傳云冀州人聖歷中拜閬中尉後與玄宗討
平韋庶人以功擢中書舍人叅知機務累封徐

國公開元初授尚書左丞相兼黃門監姚崇忌之
以快望貶睦州刺史轉桂陽郡刺史卒謚曰文獻

五言絕句

書懷

心為明時盡君門，尚不容田園。迷徑路歸去，欲何從。

言之可悼人臣事
君何至欲歸無路

張敬忠

張仁愿在朔方奏用御史張敬忠等分總軍
事累遷吏部郎中開元中拜盧平節度使

七言絕句

邊詞

五原春色舊來遲，二月垂楊未挂絲。
正是長安花落時，今河畔冰開日

自可
斷腸

姚崇

本傳云本名元崇陝州人應下筆成章舉累遷夏官中郎武后奇其才超遷夏官侍郎知政事俄遷

鳳閣侍郎春官尚書睿宗時為中書令先天中代郭元振為兵部尚書同中書門下三品復遷紫微令開

元中封梁國

公卒謚文獻

五言律詩

秋夜望月

明月有餘鑒
羈人殊未安
桂含秋樹晚
波入夜池寒
灼灼雲枝淨
光光草露團
所思迷所在
長望獨長歎

修
潔

賈曾

文苑傳云洛陽人少知名景雲中為吏部員外郎開元初拜中書舍人與蘇晉同掌制誥皆以詞學

見知時稱蘇曾
遷禮部侍郎卒

七言律詩

奉和春日出苑矚目應令

時為太子舍人
使在東都作

銅龍曉闕問安迴
金輅春遊博望開
渭水晴光搖草樹
終南佳氣入樓臺
招賢已從高山老
托乘還徵鄴下才
臣在東周獨留滯
忻逢睿藻日邊來

張洎

紀事作
張結

金定巳月全言
七言絕句

閨怨

去年離別鴈初歸
今夜裁縫螢已飛
征客未來音信斷
不知何處寄邊衣

情感
無限

王丘

本傳云字仲山舉童子科長安中自假師主簿擢
第拜監察御史開元中拜吏部侍郎典選平允後

轉太子賓客藤爵宿
豫男拜禮部尚書卒

五言排律

奉和聖製蒼張說扈從南出雀鼠谷之作

襟帶三秦接旂常萬乘過陽原淑氣早陰谷
沍寒多花縟前茅仗霜嚴後殿戈代雲開晉
嶺江鴈入汾河北土分堯俗南風動舜歌一
聞天樂唱恭遂萬人和

語色

清綺

崔翹

齊州人崔融子開元初
為禮部尚書諡曰成

五言律詩

送友人使夷陵

猿鳴三峽裏行客舊沾裳復道從茲去思君不暫忘開
襟春葉短分手夏條長獨有幽庭桂年年空自芳

五六
入雅

附鄭郎中山亭書閣山雲起琴齋澗月留語氣亦雅
附銅雀臺銅臺宮觀委仄塵魏主園陵漳水濱卽
今西望猶堪思況復當
時歌舞人意不正當

唐詩鏡卷七

欽定四庫全書

唐詩鏡卷八

明 陸時雍 編

初唐第八

張九齡

本傳云字子壽韶州曲江人幼聰敏善屬文登進士第拜校書郎玄宗在東宮舉天下文藻之

士親加策問九齡對策高第開元中選中書舍人後出為桂州都督充嶺南按察使召入累遷中書令知政事宥有陳奏多見納用宰相每薦引公卿上必問風度得如九齡否坐引周子諒左遷荊州大都督府長史請歸拜墓卒謚文獻九齡為中書令時天長節百寮上壽多獻珍異唯九齡進金鏡錄五卷言前古

興廢之道

上賞異之

張曲江五言古詩秀骨清襟言多哀愴
知其為孤高之士自開唐至此一人

五言古詩

歲初巡屬縣登高安南樓言懷

山城本孤峻憑高結層軒江氣偏宜早林英粲已繁餘
滋含宿霽衆妍在朝暎拂衣釋簿領伏檻遺紛喧深俯
東谿澳遠延南山樊歸雲納前嶺去鳥投遙村目盡有
餘意心惻不可諉竭來彭蠡澤載經敷淺原春及但生

思時哉無與言不才叨過舉唯力酬明恩美化猶寂蔑
迅節徒飛奔雖無成立効庶以去思論行復徇孤迹亦
云吾道存

端然
雅韻

秋晚登樓望南江入始興郡路

潦收沙衍出霜降天宇晶伏檻一長眺津途多遠情思
來江山外望盡煙雲生滔滔不自辯役役且何成我來
颯衰鬢孰云飄華纓樞馬苦蹉跎籠禽念遐征歲陰向

金史四庫全書
卷六
晚晚日夕空屏營物生貴得性身累由近名內顧覺今
是追歎何時平

陶鍊欲輕遂
令風骨不見

臨泛東湖

時任
洪州

郡庭日休暇湖曲邀勝踐樂職在中和靈心挹上善乘
流坐清曠舉目眺悠緬林與西山重雲因北風卷晶明
畫不逮陰影鏡無辨晚秀復芬敷秋光更遙衍萬族紛
可佳一遊豈能展羈孤忝邦牧顧已非時選長公世不

容長孺心亦褊永念出籠繫常思退疲蹇歲徂風露嚴
日恐蘭苕剪佳辰不可得良會何其鮮罷興還江城閉
關聊自遣

晨坐齋中偶而成詠

寒露潔秋空遙山紛在矚孤頂乍脩聳微雲復相續人
茲賞地偏鳥亦愛林旭結念憑幽遠撫躬曷羈束仰霄
謝逆翰臨路嗟疲足徂歲方睽攜歸心亟躑躅休閒儻
有素豈負南山曲

有小謝
風味

巡按自灘水南行

理棹雖云遠，飲水寧有惜。
況乃佳山川，怡然傲潭石。
竒峯岌前轉，茂樹隈中積。
猿鳥聲自呼，風泉氣相激。
目因詭容逆，心與清暉滌。
紛吾謬執簡，行郡將移檄。
即事聊獨歡，素懷豈兼適。
悠悠詠靡盬，庶以窮夕日。

在郡秋懷

秋風入前林，蕭颯鳴高枝。
寂寞遊子思，寤歎何人知。
宦

成名不立志存歲已馳五十而無聞古人深所疵平生
去外飾直道如不羈未得操割効忽復寒暑移物情自
古然身退毀亦隨悠悠滄海渚望望白雲涯露下霜且
降澤中草離披蘭艾若不分安用馨香為

懷抱風

骨俱佳

題畫山水障

心累猶不盡果為物外牽偶因耳目好復假丹青妍嘗
抱野間意而迫區中緣塵事固已矣秉意終不遷良工

適我願妙墨揮巖泉變化合羣有高深俾自然置陳北
堂上做像南山前靜無戶庭出行已茲地偏萱草憂可
樹合歡忿益蠲所因本微物況乃憑幽筌言象會自泯
意色聊自宣對翫有佳趣使我心渺綿

語有
真際

雜詩

孤桐亦胡為百尺傍無枝疎陰不自覆脩幹欲何施高
岡地復迴弱植風屢吹凡鳥已相噪鳳凰安得知

湘水弔靈妃斑竹為情緒漢水訪遊女解佩欲誰與同
心不可見異路空延佇浦上青楓林津傍白沙渚行吟
至落日坐望祇愁予神物亦豈孤佳期竟何許

睽睽
無已

感遇

孤鴻海上來池潢不敢顧側見雙翠鳥巢在三珠樹
矯珍木巔得無金丸懼美服患人指高明逼神惡今我
遊冥冥弋者何所慕

氣格稜稜
初唐絕色

漢上有游女求思安可得袖中一札書欲寄雙飛翼冥
冥愁不見耿耿徒緘憶紫蘭秀空蹊皓露奪幽色馨香
歲欲晚感歎情何極白雲在南山日暮長太息

仿佛阮

公體

我有異鄉憶宛在雲溶溶憑此目不覩要之心所鍾但
欲附高鳥安敢攀飛龍至精無感遇悲惋填心胃歸來
扣寂寞人願天豈從

言之
慨然

五言律詩

蘇侍郎紫微庭各賦一物得芍藥

仙禁生紅藥微芳不自持
幸因親切地還遇艷陽時
名見桐君錄香聞鄭國詩
孤根若可用非直愛華滋

調當 芍藥無香即言香無害
詩以風味為佳不以事實為貴

餞陳學士還江南同用徵字

荷篠旋江澳銜杯餞霸陵
別前林鳥夕歸處海煙凝
風

金定巳乃合言
卷八
土鄉情接雲山客念憑聖朝巖穴選應待鶴書徵

三四溫其如玉大足
雅音指顧景色佳絕

旅宿淮陽亭口號

日暮荒亭上悠悠旅思多故鄉臨桂水今夜渺星河暗
草霜華發空亭鴈影過興來誰與晤勞者自為歌

氣格
獨饒

望月懷遠

海上生明月天涯共此時情人怨遙夜竟夕起相思滅

燭憐光滿披衣覺露滋不堪盈手贈還寢夢佳期

起結圓滿五六語有
姿態幾為踟躕彷徨

秋懷

感惜芳時換誰知客思懸憶隨鴻向煖愁學馬思邊留
滯機還息紛擘網自牽東南起歸望何處是江天

三四巧而
雅韵甚

附和黃門盧侍御詠竹 清切紫庭垂歲蕤防露枝
色無空月變聲有惠風吹高節人相重虛心世所知
鳳凰佳可食一去一來儀 此
亦佳詠苦無餘韵病在太切耳

五言排律

奉和聖製早渡蒲津關

魏武中流處軒皇問道迴長堤春樹發高掌曙雲開龍
負王舟渡人占仙氣來河津會日月天仗役風雷東顧
重關盡西馳萬國陪還聞股肱郡元首詠康哉

清
偉

奉和聖製同二相南出雀鼠谷

設險諸侯地承平聖主巡東君朝二月南旆擁三辰寒

出重關盡年隨行漏新瑞雲叢捧日芳樹曲迎春舞詠
先馳道恩華及從臣汾川花鳥意併奉屬車塵

語饒

佳麗

奉和聖製送尚書燕國公赴朔方

宗臣事有征廟筭在休兵天與三台座人當萬里城朔
南方偃革河右暫揚旌寵錫從仙禁光華出漢京山川
勤遠畧原隰軫皇情為奏薰琴唱仍題寶劍名聞風六
郡伏計日五戎平山甫歸應疾留侯功復成歌鐘旋可

望衽席豈難行四牡何時入吾君憶履聲

三四典雅瑰麗五六朔南後惜不警排律貴在嚴整初唐惟沈宋為佳九齡以流利行之便為損格

酬趙二侍御使西軍贈西省舊寮之作

石室先鳴者金門待制同操刀嘗願割持斧竟稱雄應
敵兵初起緣邊虜欲空使車經隴月征旆繞河風忽枉
兼金訊非徒秣馬功氣清蒲海曲聲滿柏臺中顧已塵
華省欣君震遠戎明時獨匪報嘗欲退微躬

體氣
適緊

與弟遊家園

定省榮君賜來歸是晝遊林鳥飛舊里園果讓先秋枝
長南庭樹池臨北澗流星霜屢爾別蘭麝為誰幽善積
家方慶恩深國未酬棲棲將義動安得久情留

園果句有味 善積家方
慶恩深國未酬讀之幾起

郡內閒齋

郡閣晝常掩庭蕪日復滋簷風落鳥毳窻葉掛蟲絲拙

病宦情少羈閒秋氣悲理人無異績為郡但經時唯有
江湖意沈冥空在茲

五言絕句

賦得自君之出矣

自君之出矣不復理殘機思君如滿月夜夜減清輝

照鏡見白髮

宿昔青雲志蹉跎白髮年誰知明鏡裏形影自相憐

抱志年徂自為悲咤不若王處仲詠
老驥詩擊唾壺盡裂為是發揚蹈頓

王翰

新唐書云字子羽晉陽人少豪邁恃才及進士第然喜葡萄酒張嘉貞張說為本州長史後遇之舉直

言極諫調昌樂尉後為駕部

員外郎坐事貶道州司馬卒

七言絕句

涼州詞

葡萄美酒夜光杯欲飲琵琶馬上催
醉卧沙場君莫笑

古來征戰幾人回

跌宕

春日思歸

楊柳青青杏發花年光誤客轉思家不知湖上菱歌女
幾箇春舟在若耶

李元紘

本傳云京兆人本姓丙氏高祖義旗入關元紘
曾祖祭率衆歸附賜姓李氏元紘性謹厚拜中

書侍郎貴為國相家無儲積雖季
文子之德何以加也卒謚文忠

五言律詩

綠墀怨

征馬噪金珂嫖姚向北河綠苔行跡少紅粉淚痕多金
屋粘花絮銀箏覆網羅別君如昨日青海鴈頻過

綺羅

輕媚

附相思怨 望月思氛直朱衾懶更薰春生翡翠帳
花點石榴裙 燕語時驚妾鶯啼轉憶君交河一萬里

仍隔數

重雲

賀知章

新唐書云字季真越州永興人證聖初擢進士
累遷太常博士開元初遷禮部侍郎無集賢院

學士俊授秘書監晚節誕放自號四明狂客及秘書
外監天寶初病夢遊帝居數日寤乃請為道士以宅
為千秋觀求周宮湖數頃為放生池有詔賜鏡湖剡
川一曲擢其子僧子為會稽郡司馬賜緋魚使侍養

年八十

六卒

五言律詩

送人之軍

常經絕脉塞復見斷腸流送子成今別令人起昔愁隴
雲晴半雨邊草夏先秋萬里長城寄無貽漢國憂

五六指點如次語致復雅如虛象竹里館
臘月聞山鳥寒崖見蟄熊太覺粗笨矣

五言絕句

題袁氏別業

主人不相識偶坐為林泉莫漫愁沽酒囊中自有錢

七言絕句

詠柳

碧玉妝成一樹高，萬條垂下綠絲絛。
不知細葉誰裁出，二月春風似剪刀。

二月春風似剪刀

春風如刀，即柳葉如絲，此其為風味之佳。

采蓮曲

稽山罷霧鬱蒼苔，鏡水無風也自波。
莫言春度芳菲盡，別有中流采芰荷。

別有中流采芰荷

語意

春容

齊澣

本傳云字洗心定州人少以詞學稱弱冠登第景雲中為監察御史歷官至吏部侍郎以事貶良德

丞累遷潤州刺史江南

採訪後為平陽太守卒

五言古詩

長門怨

乳乳孤思逼寂寂長門夜妾妬亦知非君恩那不借攜
琴就玉階調悲聲未諧將心托明月流影入君懷

小小結作不之韵趣
猶愈於刻意生情者

宋鼎

紀事云明皇
時刺襄州

五言排律

酬故人還山

舉棹乘春水歸山撫歲華碧潭宵見月紅樹晚開花
穆輕風度依微隱徑斜危亭暗松石幽澗落雲霞思鳥
吟高樹遊魚戲淺沙安知餘興盡相望紫煙賒

淺色

如碧

孫逖

文苑傳云潞州人文思敏連崔日用定為忘年交
應舉授山陰尉累轉黃門侍郎李勣出鎮太原辟

為從事後入為集賢修撰拜中書舍人掌誥八年制
勅所出為時歎服以疾求散秩改左庶子轉詹事卒

謚曰文有

集三十卷

七言古詩

丹陽行

丹陽古郡洞庭陰落日扁舟此路尋
傳是東南舊都處金陵中斷碧江深
在昔風塵起京都亂如燬雙闕戎馬
間千門戰場裏傳聞一馬化為龍
南渡衣冠亦願從石頭橫帝里京口
拒戎鋒青楓林下迴天蹕杜若洲前
轉國容都門不見河陽樹輦道唯聞
建業鐘中原悠悠幾

千里欲掃欃槍未云已英雄傾奪何紛然一盛一衰如
逝川可憐宮觀重江裏金鏡相傳三百年自從龍見聖
人出六合車馬混為一昔年王氣今何在併向長安就
堯日荆榛古木閉荒阡共道繁華不復全赤縣唯餘江
樹月黃圉半入海人煙暮來山水登臨遍覽古愁吟淚
如霰唯有空城多白雲春風淡蕩無人見

多壯
麗語

五言律詩

奉和四月三日上陽水牕賜宴應制

得春字

今日逢初夏歡遊續舊旬
氣和先作雨恩厚別成春
鳳吹臨清洛龍輿下紫宸
此中歌在藻還見躍潛鱗

三四

和厚

奉和御製登鴛鴦樓即目應制

玉輦下離宮瓊樓上半空
方巡五年狩更闢四門聰
井邑觀秦野山河念禹功
停鑾留睿作軒檻起南風

孫詩每見
饒格少韻

宴越府陳法曹西亭

公府西巖下紅亭間白雲雪梅初度臘煙竹稍迎曠水
木涵澄景簾櫳引霧氛江南歸思逼春鴈不堪聞

宿雲門寺閣

香閣東山下煙花象外幽懸燈千嶂夕卷幔五湖秋畫
壁餘鴻鴈紗牕宿斗牛更疑天路近夢與白雲遊

意象高迥

三四簡鍊

七言律詩

和上巳連寒食有懷京洛

天津御柳碧遙遙軒騎相從半下朝
行樂光輝寒食借
太平歌舞晚春饒紅妝樓下東郊道
青草洲邊南渡橋
坐見司空掃西第看君侍從落花朝

氣韵流暢 三四

出題亦有家數

和左司張員外自洛使入京中路先赴長安逢
立春日贈韋侍御等諸公

忽覩雲間數鴈迴更逢山上一花開
河邊淑氣迎芳草

林下輕風待落梅，秋憲府中高唱入春紳。
署裏和歌來共言，東閣招賢地自有，西征作賦才。

迎待二字意境不老後四語似覺堆垛局面正

附詠樓前海石榴 苦竹園南椒塢邊微香冉冉淚涓涓已悲節物同寒鴈忍委芳心與暮蟬細路獨來當此夕清尊相伴省他年紫雲新苑移花處不取霜裁近御筵

五言排律

和崔司馬登稱心山寺

郡府乘休日，王城訪道初。
覺花迎步履，香草藉行車。
倚

閣觀無際尋山坐太虛巖空迷禹跡海靜望秦餘翡翠
巢珠網鷓鴣間綺疏地靈資淨土水若護真如寶樹誰
攀折禪雲自卷舒晴分五湖勢煙合九夷居生滅紛無
象窺臨已得魚嘗聞寶刀贈今日奉瓊琚

疎疎朗朗
第未得鍊

常理

五言排律

古別離

君御狐白裘妾居絳綺幃粟鈿金夾膝花錯玉搔頭離
別生庭草征衣斷戍樓蠟蛸網清曙菡萏落紅秋小膽
空房怯長眉滿鏡愁為傳兒女意不用逡封侯

嬌豔菡萏落紅秋一語韵甚蒼瓌雨雷
柳葉如啼眼露滴蓮花似汗妝語太膩

辛弘智

五言絕句

賦詩

君為河邊草逢春心刺生妾如臺上鏡得照始分明

事紀

金定四石三言
卷八
云弘智國子監進士賦詩云云同房常定宗改始字為
轉字遂爭之皆云已作乃下牒見博士羅道琮判云昔
五言定表以理切稱奇今一言競詩取詞多為
主詩歸弘智轉選定宗以狀牒知在為公驗

古
意

徐安期

七言絕句

催妝

傳聞燭下調紅粉
明鏡臺前別作春
不須滿面渾妝却
留着雙眉待畫人

梁獻

五言律詩

王昭君

圖畫失天真容華坐誤人君恩不可再妾命在和親淚
點關山月衣銷邊塞塵一聞陽鳥至思絕漢宮春

妾命在和親
語溫而痛

庾光先

七言律詩

奉和劉採訪縉雲南嶺作

百越城池枕海圻永嘉山水復相依懸蘿弱篠垂清淺
宿雨朝暾和翠微鳥訝山經傳不盡花隨月令數仍稀
幸陪謝客題詩句誰與王孫此地歸

異想

清音

徐賢妃

名惠生五月能言四歲通論語詩八歲晚屬文
父孝德嘗試使擬離騷即為小山篇太宗聞之

召為才人手未嘗廢卷而辭贈蔚文無淹思帝亦禮
顧貞觀未數上疏極諫征伐土木之煩帝善其言優
賜之帝崩哀慕成疾不肯進藥曰上遇我厚得先殉
是侍園寢吾志也復為詩連珠以見意永徽元年贈

賢妃女弟為高宗使仔亦
有文藻世以擬漢班氏云

五言古詩

長門怨

漢武帝故事曰武帝為膠東王時長公主嫖有女
欲與王婚景帝未許後主還宮膠東王數歲長主
抱置膝上問曰兒欲得婦否長主指左右長御百
餘人皆不用指其女問曰阿嬌好否笑對曰好若
得阿嬌作婦當作金屋貯之長主乃苦要帝遂成
婚焉漢書曰孝武陳皇后長公主嫖女也擅寵嬌
貴十餘年而無子聞衛子夫得幸幾死者數焉元
光五年廢居長門宮樂府解題曰長門怨者為陳
皇后作也后退居長門宮愁悶悲思聞司馬相如
工文章奉黃金百斤令為解愁之辭相如為作長

門賦帝見而傷之復得親幸
後人因其賦而為長門怨也

舊愛栢梁臺新寵昭陽殿守分辭方輦含情泣團扇一
朝歌舞榮夙昔詩書賤顏恩誠已矣覆水難重薦

五六
自寵

上官昭容

名婉兒上官儀之女孫也辯慧能文習史事
武后愛之中宗即位使掌制命由使仔陞昭

容景龍初置修文館學士選公卿善為文者李嶠等
二十人為之使上官昭容第其中乙有集二十卷

五言律詩

奉和九月九日登慈恩寺浮圖應制

帝里重陽節香園萬乘來却邪莫入佩獻壽菊傳杯塔
類承天湧門疑待佛開睿詞懸日月長得仰昭回

綵書怨

葉下洞庭初思君萬里餘露濃香被冷月落錦屏虛欲
奏江南曲會封薊北書書中無別意惟悵久離居

五言排律

奉和幸三會寺應制

釋子談經處軒臣刻字留故臺遺老在殘簡聖君求駐

蹕懷千古開襟望九州
四山緣塞合二水夾城流
宸翰陪瞻仰天杯接獻酬
太平詞藻盛長願紀鴻休

七歲女子

五言絕句

送兄

唐史遺事云如意中女子年七歲
能詩則天令作送兄詩應聲而成

別路雲初起離亭葉正飛
所嗟人異鴈不作一行歸

有陳

隋風

楊容華

楊炯
姓女

五言律詩

新妝詩

林鳥驚眠罷房櫺曙色開
鳳釵金作縷鸞鏡玉為臺
妝似臨池出人疑向月
來自憐方未已欲去復徘徊

清麗故
有家風

士人妻

五言律詩

欽定四庫全書

離別難

樂苑雜錄曰武后朝有士人陷冤獄籍其家妻配
入掖庭善吹感粟乃撰此曲以寄情焉初名大郎
神蓋取良人第行也既畏人知遂三
易其名曰悲切子終號怨回鶴云

此別難重陳花飛復戀人來時梅覆雪去日柳含春物
候催行客歸途淑氣新剡州今已遠魂夢暗相親


喬氏

知之
妹

五言絕句

詠破簾

已漏風聲罷羅幃也不禁一從經落節無復有貞心



唐詩鏡卷八

欽定四庫全書

集部
唐詩鏡卷九至
十三

詳校官庶吉士臣范逢恩

主事銜臣徐以坤履勘

總校官編修臣王燕緒

校對官中書臣章煦

謄錄監生臣侯錫樂

欽定四庫全書

唐詩鏡卷九

明 陸時雍 編

盛唐第一

玄宗皇帝

本紀云諱隆基睿宗第三子性英斷多藝尤知音律善八分書儀範偉麗有非常之表封

楚王策后謀禪宗社率劉幽求等誅之睿宗即位立

端太子及即位樂善好賢開元中海內富實幾致刑

措天寶十四年祿山陷京師車駕幸蜀肅宗

立追尊太上皇上元二年崩在位四十七年

五言律詩

經魯祭孔子而歎之

夫子何為者栖栖一代中地猶鄆氏邑宅即魯王宮歎
鳳嗟身否傷麟怨道窮今看兩楹奠當與夢時同

對當
語

過老子廟

仙居懷聖德靈廟肅神心草合人蹤斷塵濃鳥跡深流
沙丹竈沒關路紫烟沈獨傷千載後空餘松柏林

三四語佳
結句妨體

五言排律

春晚宴兩相及禮官麗正殿學士探得風字

并序

朕以薄德祇膺歷數正天柱之將傾紉地維之已絕
故得承奉宗廟垂拱巖廊居海內之尊處域中之大
然後祖述堯典憲章禹績敦睦九族會同四海猶恐
烝黎未乂徭戍未安禮樂之政虧師儒之道喪乃命
使者衣繡服行郡縣因人所利擇其可勞所以便億
兆也乃命將士擐介冑冒矢石審山川之向背應歲

月之孤虛所以靜邊陲也乃命禮官考制度稽典則
序文昭武穆享天地神祇所以申嚴潔也乃命學者
繕落簡緝遺編纂魯壁之文章綴秦坑之煨燼所以
修文教也故能使流寓返枌榆之業戎狄稱藩屏之
臣神祇歆其禋祀庠序闡其經術既家六合時巡兩
京函秦則委翰斯遠鼎邑則朝宗所利封畿四塞從
來測景之都城闕千門自昔交風之地陰陽代謝日
月相推豈可使春色虛捐韶華並歇乃置旨酒命英

賢有文苑之高才有掖垣之良佐舉杯稱慶何樂如
之同吟湛露之篇宜振凌雲之藻於時歲在乙丑開
元十三年三月二十七日

乾道運無窮恒將人代工陰陽調歷象禮樂報玄穹介
冑清荒外衣冠佐域中言談延國輔詞賦引文雄野霽
伊川綠郊明鞏樹紅冕旒多暇景詩酒會春風

同二相以下羣官樂遊園宴

二相謂張
說宋璟

撰日巖廊暇需雲宴樂初萬方朝玉帛千品會簪裾地

入南山近城分北斗餘池塘垂柳密原隰野花疎帶幕
看逾暗歌鐘聽自虛興闌歸騎轉還奏弼違書

集賢書院成送張說上集賢學士賜宴得珍字
廣學開書院崇儒引席珍集賢招袞職論道命台臣禮
樂沿今古文章革舊新獻酬樽俎列賓主位班陳節變
雲初夏時移氣尚春所希光史冊千載仰茲晨

早度蒲關

王荆公百家選以
此篇為開卷第一

鐘鼓嚴更曙山河野望通鳴鑿下蒲坂飛旆入秦中地

險關逾壯天平鎮尚雄春來津樹合月落戍樓空馬色
分朝景雞聲逐曉風所希常道泰非復候繻同

南出雀鼠谷答張說

紀事云玄宗登封泰山南出雀鼠
谷張說獻詩玄宗御答羣臣應制

雷出應乾象風行順國人川途猶在晉車馬漸歸秦背
硤關山險橫汾鼓吹震草依陽谷變花待北巖春聞有
鷓鴣客清詞雅調新求音思欲報心跡竟難陳

千秋節宴

并序

今節肇開情兼感慶率題八韻以示羣臣

蘭殿千秋節稱名萬歲觴風傳率土慶日表繼天祥玉
宇開花萼金懸動會昌衣冠白露下帟幕翠雲長獻壽
成新俗朝儀入舊章月銜花綬鏡露綴彩絲囊處處祠
田祖年年宴杖鄉深思一德事小獲萬人康

後四語
不韻

左丞相說右丞相璟太子少傅乾曜同日上官

命宴都堂賜詩

蘇晉序云惟聖寶賢以齊皇極有若左丞相燕國公
右丞相廣平公太子少傅安陽侯皆生人碩德皇國
元老道著廊廟績宣華戎由是懋其成功錫以元圭
咨日於朔擇時於秋俾對命王庭受職公府見羣屬
揖庶寮禮官辨章掌舍陳次替工備樂侑饗獻蒸六
卿拜下以成儀三事自天而來賀秩秩賓筵暉暉旅
疇玉緯垂文南風和雅頌之奏金漿降醴雲天光飶
酌之宜宰德貴和盡莊敬具瞻之範羣情尚洽預周

金少曰... 卷九
旋宴語之歡方將一心天工戮力帝載寢黑山之柝
包青海之戈雲雨賢才水火菽粟日詠魚藻歲陳由
庚頤殷趙之年留魯陽之景爰命在宴乃賡載歌

赤帝收三傑黃軒舉二臣由來丞相重分掌國之均我
有握中璧雙飛席上珍子房推道要仲子訝風神復轍
台衡老將為調護人鵷鷺同拜日車騎擁行塵樂聚南
宮宴觴連北斗醇俾余成百揆垂拱問髮倫

早登太行山中言志

清蹕度河陽凝笳上太行火龍明鳥道鐵騎繞羊腸
白霧埋陰壑丹霞助曉光澗泉含宿凍山木帶餘霜
野老茅為屋樵人薜作裳宣風問耆艾敦俗勸耕桑
涼德慙先哲徽猷慕昔皇不因今展義何以冒垂堂

平胡 并序

戎羯不虔竊我荒服命偏師之俘翦彼應期而咸殄
一麾克定告捷相仍爰作是詩聊以言志

雜虜忽猖狂無何敢亂常羽書朝繼入烽火夜相望將

出凶門勇兵因死地強蒙輪皆突騎按劍盡鷹揚鼓角
雄山野龍蛇入戰場流膏潤沙漠濺血染鋒銚霧掃清
玄塞雲開靜朔方武功今已立文德愧前王

將出二

語剏獲

送張說巡邊

端拱復垂裳長懷御遠方股肱申教義戈劍靖要荒命
將綏邊服雄圖出廟堂三台入武帳八座起文昌寶胄
匡韓主華宗輔漢王茂先慙博物平子謝文章盡節恢

時佐輸誠禦寇場三軍臨朔野駟馬即戎行鼓吹威夷
狄旌軒溢洛陽雲臺先著美今日更貽芳

玄宗諸排律語極雅當法極
精嚴一時奉和皆所莫及

王灣

洛陽人登先天進士第開元
初為滎陽主簿後為洛陽尉

五言律詩

次北固山下

客路青山外行舟綠水前潮平兩岸闊風正一帆懸海
日生殘夜江春入舊年鄉書何處達歸鴈洛陽邊

王灣此詩世賞已久余閱之了無佳處潮平二語
但氣殊甚海日生殘夜畧有景色江春入舊年此
溷語耳余且問舊年景象何似今下此語將謂意
入感慨語病突矣且一切物色何處不可云入舊
年此非一套語耶張說手題此詩示為楷式緣說
平生詩好華美一見此作便謂雅澹其實非也
張均燕國公說長子能文開元中為中書舍人歷官至
刑部尚書大理卿祿山之亂授偽命為中書令掌
賊樞衡肅宗立免死
長流合浦郡見說傳

五言排律

巴丘春日作

日出洞庭水春山挂斷霞江涔相映發卉木共紛華湘

戍南浮閣荆關北望賒湖陰窺魍魎丘勢辨巴蛇島戶
巢為館漁人艇作家自憐心問影三歲客長沙

島戶二語

異境佳句

李昂

開元中為考功員外郎性剛急
不容物嘗典試事不受囑請

七言古詩

從軍行

漢家未得燕支山征戍年年沙朔間塞下長驅汗血馬
雲中恒閉玉門關陰山瀚海千萬里此日桑河凍流水

稽洛山邊胡騎來
漁陽戍裏烽煙起
長途羽檄何相望
天子按劍思北方
羽林練士拭金甲
將軍校戰出玉堂
幽陵異域風煙改
亭障連連古今在
夜聞鴻鴈南渡河
曉望旌旗北臨海
塞沙飛浙溼遙裔
連窮磧玄漠雲平
初合陣西山月出
聞鳴鏑城南百戰
多苦辛路傍死卧
黃沙人戎衣不脫
隨霜雪汗馬趁趨
長被鐵楊葉樓中
不寄書蓮花劍上
空流血匈奴未滅
不言家驅逐行行
邊徼賒歸心海外
見明月別思天邊
夢落花落花迴望

何悠悠芳樹無人度隴頭春雲不變陽關雪桑葉先知
胡地秋田疇不賣盧龍策竇憲思勒燕然石麾兵靜北
垂此日交河湄欲令塞上無干戚會待單于繫頸時

語有
氣

張若虛

開元初人與賀知章張
旭包融號吳中四士

七言古詩

春江花月夜

春江潮水連海平海上明月共潮生滌滌隨波千萬里

何處春江無月明
江流宛轉遶芳甸
月照花林皆似霰
空裏流霜不覺飛
汀上白沙看不見
江天一色無纖塵
皎皎空中孤月輪
江畔何人初見月
江月何年初照人
人生代代無窮已
江月年年祇相似
不知江月待何人
但見長江送流水
白雲一片去悠悠
青楓浦上不勝愁
誰家今夜扁舟子
何處相思明月樓
可憐樓上月徘徊
應照離人妝鏡臺
玉戶簾中卷不去
擣衣砧上拂還來
此時相望不相聞
願逐月華流
照君鴻鴈長飛光不度

魚龍潛躍水成文
昨夜閒潭夢落花
可憐春半不還家
江水流春去欲盡
江潭落月復西斜
斜月沈沈藏海霧
碣石瀟湘無限路
不知乘月幾人歸
落月搖情滿江樹

微情渺思多
以懸感見奇

包融 延陵人開元初與賀知章張旭劉昶虛
皆有名號吳中四士官至大理司直

五言律詩

和崔會稽詠王兵曹廳前湧泉勢成中字

茂德來徵應
流泉入詠歌
含靈符上善
作字表中和
有

草恒垂露無風欲偃波為看人共水清白定誰多

穗

劉春虛

江東人為夏縣令與賀知章包融張旭號吳中四士明皇雜錄云天寶中劉春虛輩雖有文章

盛名流
落不偶

五言律詩

寄江滔求孟六遺文

南望襄陽路思君情轉親
偏知漢水廣應與孟家鄰
在日貪為善昨來聞更貧
相如有遺草一為問家人

清瘦 似中唐氣
格 第五句佳

蔡希寂

曲阿人為
渭南尉

五言律詩

陝中作

西別秦關近東行陝服長川原餘讓畔歌吹憶遺崇河
水流城下山雲起路傍更憐樓泊處池館繞林篁

張子容

先天二年進士為樂
城尉與孟浩然友善

子容詩無深情語多爽
氣酷與孟浩然相近

五言律詩

雲陽驛陪崔使君邵道士夜宴

一尉東南遠誰知此夜歡
諸侯傾皂蓋仙客整黃冠
染翰燈花滿飛觴雲氣寒
欣承國士遇更借美人看

永嘉作

拙宦從江左投荒更海邊
山將孤嶼近水共惡谿連地
濕梅多雨潭蒸竹起煙
未應悲晚髮炎瘴苦華年

除夜樂城逢孟浩然

遠客襄陽郡來過海岸家樽開栢葉酒燈發九枝花妙
曲逢盧女高才得孟嘉東山行樂意非是競繁華

永嘉卽事寄贛縣袁少府瓘

山繞樓臺出谿通里閑斜曾為謝客郡多有逐臣家海
氣朝成雨江天晚作霞題書報賈誼此濕似長沙

五言排律

長安早春

開國維東井城池起北辰咸歌太平日共樂建寅春雪

盡黃山樹水開黑水津草迎金埒馬花伴玉樓人鴻漸
看無數鶯歌聽欲頻何當桂枝擢還及柳條新

草迎二語色韶而嫩贈蕭郎中江
山清謝眺花木媚立遲亦絕清快

李適之

本傳云一名昌恒山王承乾之孫神龍初拜左
衛郎開元中歷官至刑部尚書雅好賓客飲酒
一斗不亂天寶中為左相累封清和縣公與李林甫
不叶為其陰中罷知政事坐事貶宜春太守仰藥死

五言絕句

罷相作

本傳云適之為李林甫所構懼不自安乃上宰相
求散職以太子少保罷欣然自以為免禍本

云開元中宰相李適之疎直坦夷時譽甚美李林甫惡之排誣罷免朝客雖知無罪謁問息稀適之意憤日飲醇酎且為詩云
云林甫愈怒終遂不免

避賢初罷相樂聖且銜杯為問門前客今朝幾箇來

李愷

忠義傳云太原人以明經舉開元中為監察御史給事中天寶中轉光祿卿東京留守遷禮部尚書安祿山陷都城遇害諡曰忠懿

七言律詩

奉和聖製從蓬萊向興慶閣道中留春雨中春

望之作應制

別館春還淑氣催
三宮路轉鳳凰臺
雲飛北闕輕陰散
雨歇南山積翠來
御柳遙隨天仗發
林花不待曉風開
已知聖澤深無限
更喜年芳入睿才

標格清挺三四色
相自然
物自有色詩自有情
當前直舉無非妙
境細草偏承迴輦處
飛花故落舞觴前
河邊淑氣迎芳草
林下輕風待落梅
皆舍却真身別求他
相直是欲真不能
乃自苦耳若一切
歸之正法門大神
力則邪魔小技無
所容其毫末

崔惠童

紀事云尚明
皇晉國公主

七言絕句

宴城東莊

一月人生笑幾回相逢相識且銜杯眼看春色如流水

今日殘花昨日開

末句倒挿見

奇語氣英爽

附崔敏童

一年始有一年春百歲曾無百歲人能
向花中幾回醉十千沽酒莫辭貧 順寫即平凡倒

挿如峯順流如水

故文以逆用為奇

儲光義

兖州人一云潤州人開元中進士詔中書試文
章歷監察御史祿山反陷賊自歸有集七十卷

詩家恬澹之難甚於絢爛千古惟陶徵君恬澹而
絢爛者比踵接肩儲光義衷無本情語無定趣前

後自不相喻段璠謂其格高調逸趣深情深樂城
遺言謂高處似陶淵明平處似王摩詰此誠不識
所謂聊就其佳者一二論之

五言古詩

野田黃雀行

嘖嘖野田雀不知軀體微
閒穿深叢裏爭食復爭飛
窮老一積舍棗多桑樹稀
無棗猶可食無桑何以衣
蕭條空倉暮相引時來歸
斜路豈不捷渚田豈不肥
水長路且壞惻惻與心違

詩人必有安身立命之處然後假物布衣據其所
抱如野田黃雀行祇一窮困無聊語耳斜路豈不
捷渚田豈不肥水長路且壞惻惻與心違
若水路便於適從豈能審正而自止耶

田家即事

蒲葉日已長荇花日已滋老農要看此貴不違天時迎
晨起飯牛雙駕耕東菑蚯蚓土中出田烏隨我飛羣合
亂啄噪噉噉如道饑我心多惻隱顧此兩傷悲撥食與
田烏日暮空筐歸親戚更相誚我心終不移

此事亦何足道親戚何至相誚而心且堅東不
移老杜云減食及溪魚此在無心偶及之可耳

同王十三維偶然作

野老本貧賤，冒雨鋤瓜田。
一畦未及終，樹下高枕眠。
荷篠者誰子，皤皤來息肩。
不復問鄉墟，相見但依然。
腹中無一物，高話羲皇年。
落日臨層隅，逍遙望晴川。
使婦提蠶筐，呼兒榜漁船。
悠悠泛綠水，去摘浦中蓮。
蓮花艷且美，使我不能還。

無此結語要知其意趣何在

田家雜興

春至鶻鷓鳴薄言向田野不能自力作黽勉娶鄰女既
念生子孫方思廣園圃閒時相顧笑喜悅好禾黍夜夜
登嘯臺南望洞庭渚百草被霜露秋山響砧杵却羨故
年時中情無所取

玩末二語豈年老妻孥累耶乃解者云此意為既
念生子孫方思廣園圃發耳若是則此意正未見
得凡人必有目前之樂然後追昔日之煩若以
煩惱遣之則一空門之類耳其何足為高士

附效古 晨登涼風臺暮走邯鄲道曜靈何赫烈四
野無青草大軍北集燕天子西居鶴婦人役州縣丁
男事征討老幼相別離哭泣無昏早稼穡既殄絕川
澤復枯槁曠哉遠此憂冥冥商山皓如此而商山

皓乃足為高則四人亦逋徒耳何光義所憂之多忘
憂之易也如樵父詞牧童詞射雉詞種種淺陋餘不

復多

及
附樵父詞 山北饒朽木山南多枯枝枯枝作採薪
爨室私自知 詰朝礪斧尋視暮行歌歸先雪隱薜荔
迎暄卧茅茨清澗日濯足喬林時曝衣終年登
險阻不復憂安危蕩漾與神遊莫知是與非

附牧童詞 不言牧田遠不道牧陂深所念牛馴擾
不亂牧童心圓笠覆我首長蓑披我襟方將憂暑雨
亦以懼寒陰大牛隱層坂小牛穿近林同類相
鼓舞觸物成謳吟取樂須臾閒寧問聲與音

附射雉詞 曝暄理新翳迎春射鳴雉原田遠一色
阜陸曠千里遙聞唧喔聲時見雙飛起羃歷疎蒿下
毳毼深麥裏顧敵乃忘生爭雄方決死仁心貴勇義
豈復能傷此超遙下故墟迢遞回高時大夫昔何苦

取笑歡
妻子

五言絕句

江南曲

逐流牽荇葉緣岸摘蘆苗為惜鴛鴦鳥輕輕動畫橈

唐詩鏡卷九